

宣
統
新
疆
圖
志

新疆圖志卷九十六

奏議六

續刊 左宗棠五

官軍窮追夷回連復阿克蘇烏什摺

剿除沙雅爾回逆分道進規喀什噶爾摺

新疆應否改設行省請飭會議摺

請變通部章廣搜人才摺

流寓種人應遣回國布魯特部落准附中國各邊隘應築邊牆摺

官軍克復西四城新疆肅清摺

覆陳新疆情形摺

官軍窮追夷回連復阿克蘇烏什摺

竊官軍進規新疆南路連復喀喇沙爾庫車兩城仍躡蹤追剿進規阿克蘇并布置後路情形 已於十月十四日馳報茲據總理行營營務總統馬步各軍三品卿銜布政使銜甘肅西甯道法福

靈阿巴圖魯劉錦棠稟稱九月十五日黎明督率所部由和色爾拔隊進發行八十里追及賊尾約百數十騎總兵方友升督隊奮擊陣斬五十餘名生擒一名據供此股係白逆噉令緩行斷後藉探官軍消息者也劉錦棠整隊馳追至拜城地方城外莊堡無人城門牢閉但見一二探頭外望者遣通事告以官軍已至城中頭目乃縋數人出城據稱白逆昨日過此與本城所踞安集延腓色提及庫車逃來各腓色提脅纏頭俱竄本地回目阿克奈本釐不從被殺賊將城外莊堡燒掠一空裹脅回民與之俱行城內回衆見事急卽閉城門白逆攻之未下今早已與安集延腓色提率黨西竄等語劉錦棠徧加撫慰其大頭目買賣提托呼達乃率小頭目開城詣營乞撫劉錦棠令方友升率靖營馬隊駐紮城外招集逃亡布置甫定令各營將領蓐食急進十六日五更履冰而行霜凌凝積手足凍皴人馬交困行八十里抵銅廠偵知賊正催眷口渡河卽傳令各營結隊邁進隙見騎賊數百名監押纏回約二萬

餘名竊集河岸立卽揮隊猛撲見騎賊卽殺人馬之屍頃刻堆積
河中水爲不流被裹纏回悉數遣歸拜城散遣復業復率所部亂
流而渡行三十里探報賊在前二十餘里之上銅廠列陣似有拒
敵之勢劉錦棠率馬隊前行令步隊殿陣繼進賊分兩路迎拒官
軍亦張兩翼包之夏辛酉張宗本譚慎典率馬隊擊其右路席大
成戴宏勝賀長發率步隊繼之黃萬鵬崔偉畢大才禹益長禹中
海李金良馬殿林率馬隊擊其左路張俊胡登花石蘊玉率步隊
繼之劉錦棠自率馬隊親兵居中調度分布畢號鼓齊發兩路馬
隊奮威衝殺賊噉連環施放正相持間右路夏辛酉躍馬衝入賊
陣生擒貂衣賊一名所部勇士一齊衝入賊驚駭失措官軍馬步
相依併力夾擊斃賊無算左路之賊見右路大敗相率奔潰黃萬
鵬等馬步乘之鎗轟矛刺賊屍徧野兩路乘勝壓追過察爾齊克
台之西三十餘里計斃賊數千名生擒悍賊百二十六名奪獲戰
馬二百餘匹拾獲軍械無算日暮收隊回察爾齊克台駐營提訊

擒賊半係陝逆半係安夷訊知白逆本不敢戰因安集延各酋再三促之始嗾死黨抗拒因而致敗是日陣擒貂衣賊目訊係安集延分踞阿克蘇之胖色提要路打什也左路賊爲白逆死黨右路賊爲分踞三城之胖色提等各酋白逆見前賊已敗嗾隨身死黨卽竄訊畢斬之十七日官軍拔隊復進度戈壁百四十里至哈拉裕勒偵知是日午間白逆甫由此過令各隊小憩片時仍卽前進十八日子時抵札木台師行已六十里解鞍小憩馳薄阿克蘇城未至城數里遙見城頭鎗矛林立西南正西兩面飛塵蔽天遺騎偵探知城內總頭目阿布都勒滿謀率衆投誠被各胖色提縛之西去白逆亦率死黨同遁城內纏回十數萬則皆守城以待官軍者劉錦棠飛飭譚慎典夏辛酉張宗本由西南一路躡蹤緊追仍令度大成戴宏勝賀長發繼之黃萬鵬崔偉畢大才禹益長禹中海李金良馬殿林由正西一路旁出截擊仍令張俊胡登花石蘊玉繼之一面飭阿克蘇城頭日出城諭以恩威各回目膜拜乞撫

劉錦棠受之入居阿克蘇蒲城晡間派出之西南路將領報稱追及賊尾陣斃悍賊百餘名生擒二十三名訊係安夷卽於陣前斬之其派出之正西一路將領同時報稱追至胡瑪納克河遙遇悍賊數百騎擁護白逆眷口奔走見官軍奄至合力死拒官軍馬隊突前陷陣步卒踵進立斃賊四百餘名拔出哈密纏回男婦數百口詢知哈密回王邁哈默特之母亦在其中遂令暫回庫車候遣弁護歸哈密而白逆隨行賊眷二千餘名口均拋棄在途亦一併送回庫車靜候安插訊據擒賊供白逆原擬與安集延各酋分路而竄一走烏什一走葉爾羌冀可分兵力而延殘喘劉錦棠遂決計舍安夷而追白逆飭黃萬鵬張俊馬步兩營向烏什再進並調譚慎典夏辛酉各率馬隊繞正西一路與黃萬鵬等會隊十九日五更踏冰渡胡瑪納克河行八十里戈壁中擒白逆尾股馬有才等十六名陣前斬之二十日未刻行距烏什城東二十里瞥睹賊蹤各營將領張兩翼抄之該逆驚覺拚死狂奔黃萬鵬等馬步齊

進斬馘數十名生擒數名奪獲賊馬八十餘匹日暮駐營烏什城外二十一日五更拔隊行九十餘里至阿他伯什地方彌望戈壁杳無賊蹤聞此處有小路可通喀什噶爾計程不過數百里萬山叢沓本徼外荒地不隸版圖訊之士回間有黑利黑斯插帳游牧黑利黑斯者本額魯特種人與生番相似白逆既竄此間應可令其擒獻惟邊內雜虜向與新疆不通聲息烏什土回無從設法劉錦棠雖擬購綫追捕竊以爲難有把握也。維新疆南路以阿克蘇爲關鍵北通伊犁西連烏什東接庫車迤西達喀什噶爾又可達葉爾羌英吉沙爾稍南而東則達和闐爲形勢所必爭阿克蘇既復該逆竄路悉窮既由烏什邊外逸去非至喀什噶爾別無歸宿所附大軍圍剿或可聚殲此次官軍浩蕩西征一月馳驅三千餘里收復喀喇沙爾庫車阿克蘇烏什四城南疆八城已復其半劉錦棠所部留後馬步八營九月二十五日方抵庫車甫進阿克蘇合隊張曜所部嵩武軍十月初二日方由喀喇沙爾迤指庫車

前茅既銳後勁仍逾戎機順迅古近罕其比東四城既克和闐葉爾羌英吉沙爾喀什噶爾西四城分攻合剿自有餘力就四城言之和闐回目呢牙子早已遞稟輸誠英吉沙爾蓋爾彈丸無能作梗如葉爾羌速下官軍會攻喀什噶爾并規全局似勘定之期當亦不遠矣惟官軍曠夕千變非敬謹將事必蹈危機固有不可輕心嘗試者臣惟當戒懼自持申儆寮佐慎以圖之仰慰

宵旰憂勤於萬一此次迅赴戎機諸將士圖報之念非由希倖邊功而起而勞烈究難掩仰劉錦棠來稟深以白逆漏逸引爲己咎乞免甄錄臣竊謂連復四城實劉錦棠及所部將士之力有功必賞古之常經合無仰懇

天恩加以獎叙其死事各弁員均係冒險赴敵血戰捐軀深堪悼惜伏懇

天恩飭部各照官階從優議卹以慰忠魂所有官軍疊獲大捷克復阿克蘇烏什兩城詳細情形謹會同幫辦新疆軍務大臣伊犁

將軍 金順恭摺據實馳

奏伏乞

聖鑒訓示施行

剿除沙雅爾回逆分道進規喀什噶爾摺

竊 接據總理行營營務候補三品京卿劉錦棠十月二十七日
阿克蘇馳報東四城既復各城堡回民就撫安堵如常惟庫車迤
南沙雅爾回目麻木爾曾充安集延玉子巴什之職甘心從逆官
軍攻克達坂城時生擒縱歸麻木爾得歸沙雅爾故巢後煽誘土
回及哈密各處客回仍附安集延所設庫車胖色提聽其指嚇比
官軍攻克庫車麻木爾擊其黨夥三四百人潛竄哈番地方哈番
在阿克蘇城南迤西四百四十里適已就撫之甯河滑蹄回且欺
營來報同時接前路偵報十月初五日哈番又到一股匪回六七
百人與麻木爾合勢謀拒官軍劉錦棠令提督譚慎典副將夏辛
酉帶馬隊提督席大成戴宏勝帶步隊親率以行十月初八日夜

三鼓拔營初九日抵甯河滑歸初十日抵巴河首知賊復順哈什

錦棠令繼回躡漢覓路策馬先行馬步繼進調知賊尙踞原處
官軍號鼓齊鳴整隊而前麻木爾嗾衆墜門鎗礮環施譚慎典席
大成戴宏勝潘長清奮威衝擊賊不能當馬隊中有舊識麻木爾
者測準開鎗正中麻木爾而頰子由口內穿耳旁出賊衆驚潰劉
錦棠揮隊衝殺陣斬悍賊三百餘級生擒數十名其老幼婦女牲
累則先已散匿林中次日入山搜捕獲沙雅爾老小眷屬五百餘
名口交隨征回目帶歸沙雅爾其哈密客回則由營派員解回阿
克蘇訊據各回供稱麻木爾受傷瞥見數騎擁之穿林鼠竄伊等
不知其下落也劉錦棠派令搜山杳無賊蹤乃收隊回阿克蘇正
擬分道進兵布置一切忽接南路偵報求撫回目和蘭伯克呢牙
斯聞官軍西進遽率所部回衆進圖葉爾羌怕夏長子伯克胡里
得據葉爾羌之大通哈飛報卽由喀什噶爾帶五千騎赴援葉爾

羌彼此搏鬪甚力呢牙斯爲伯克胡里所敗并失和闐而從前換防官軍守備何步雲旗員英詔等遣漢回問道來營遞稟急求反正據稱逆回白彥虎九月底竄至喀什噶爾東北百八十里卡里他亞以兩克地方人不滿百飢疲殊甚惟新擄布魯特馬則倍多於人伯克胡里已由喀什噶爾帶騎賊赴葉爾羌南與呢牙斯戰勝負未分留蹉喀什噶爾頭目阿里達什拒白彥虎不納何步雲英詔率滿漢兵民數百人占據漢城乞發兵救援旋據探報伯克胡里聞官軍已克庫車引衆向英吉沙爾竄走留人蹉和闐何步雲入報占據漢城後阿里達什逐日攻撲并聞伯克胡里准白彥虎入喀什噶爾助攻漢城之信劉錦棠統籌西四城局勢原應先取葉爾羌次規喀什噶爾英吉沙爾惟喀什噶爾兵民反正已據漢城機未可失則先攻喀什噶爾邊城裏賊中央俟張曜全軍取齊分道并規縱橫掃蕩機局更無不宜遂飭提督余虎恩率步隊三營馬隊一起總兵桂錫楨馬隊一營一起由阿克蘇取道巴爾

近爲師期先後總以十一月十四日同抵喀什噶爾爲準兩路均聽余虎恩節制以一事權而巴爾楚克瑪納巴什形勢最勝劉錦棠俟兩路起行後卽親率馬步各營前往駐紮以扼和闐葉爾羌衝要並便策應前敵之軍一俟張曜全軍取齊屆時協力并規或合或分自富相機酌辦其由喀喇沙爾庫爾勒至庫車拜城一路以駐吐魯番之提督易開俊安遠一軍填防易開俊所遺之托克遜曲惠兩處防務以總兵劉鳳清步隊兩營分布駐紮至吐魯番及瞭墩十三間房東通哈密之處則以標遊擊宋得祿選鋒馬隊兵一營總兵夏奉朝守備賓恩驪馬隊兩起前往接防計此時已度戈壁抵哈密而西矣自肅州嘉峪關以抵吐魯番托克遜以抵庫車皆防軍也自庫車至阿克蘇巴爾楚克爲且防且戰之軍自巴爾楚克瑪納巴什以抵喀什噶爾英吉沙爾則主戰之事常

山率然勢成首尾相應數千里一氣卷舒將士心目中皆有全局洞貫之象而自庫爾勒以西所歷又皆腴疆天時地氣不殊中土回思關塞荒瘠寒苦勞費艱阻情形蓋居然苦盡甘來人人慰意此足仰紆

宵旰憂勤於萬一者惟師行日遠驛道逶遲以後軍報慮難迅速馳遞緣台站創立諸務紛繁卽書役亦須由關內雇覓供差非若內地有州縣驛丞吏役承辦可期更捷也謹先陳明乞紆

慈廛所有剿除逆回收撫餘衆分道進規喀什噶爾并調度布置情形謹會同幫辦新疆軍務大臣伊犁將軍金順恭摺馳陳伏乞

聖鑒訓示施行

新疆應否改設行省請飭會議摺

竊於上年六月十六日具奏遵

旨統籌全局謹將愚慮所及據實密陳一摺七月十七日承准軍

機大臣字寄光緒三年七月初二日奉

上諭左宗棠所陳統籌新疆全局自爲一勞永逸之計南路地多饒沃將來全境肅清經理得宜軍食自可就地取資惟目前軍餉支絀若南路一日不平則曠日持久餉匱兵飢亦屬可慮該大臣所稱地不可棄兵不可停非速復腴疆無從著手等語不爲無見著卽督飭將士戮力同心尅期進剿并揆時度勢將如何省費節勞爲新疆計久遠之處與擬改行省郡縣一併通盤籌畫妥議具奏欽此跪誦之餘欽仰無既上年秋後官軍由托克遜吐魯番聯絡西進所有布置一切及餉糧轉運地勢賊踪已疊次預爲陳奏仰伏

朝廷威福師行迅利連克喀喇沙爾庫車烏什阿克蘇四城劉錦棠派余虎恩黃萬鵬等分軍兩路進攻喀什噶爾駐軍於巴爾楚克瑪納爾巴什以扼葉爾羌和闐衝要兼策應前敵之軍均經疊次陳奏頃據總理行營營務處候補三品京堂劉錦棠十一月十

九日葉爾羌馳報已於十七日克復葉爾羌城適接余虎恩黃萬鵬飛稟十三日齊抵喀什噶爾卽於是夜克復喀什噶爾滿漢兩城復出城追勦竄賊尙未收隊又據張曜牘稱由阿克蘇先派馬隊三營赴前敵助勦適和闐伯克呢牙斯偕男婦五百餘口由間道來投瀕懇安插 批令仍歸和闐收輯部衆劉錦棠甫將大概情形馳報卽於二十日率馬步各營繞道英吉沙爾以抵喀什噶爾所有復城殺賊詳細情形俟劉錦棠到喀什具報到 當卽露布

上
聞仰紆

慈暉是南疆尅期底定尙免老師糜餉之虞而官軍自克復喀什噶爾以後所歷均是腴疆 調閱各城米糧布匹銀錢及軍民所需日用百貨價值清單與東南各省腹地相若且有較之內地市價更爲平減者加以經理則民用裕軍儲皆有攸賴見飭古城巴里坤哈密安西探運局減探停運并將各局分別撤留以示撙

節十年艱難苦恨百計經營時度弗逮者一旦霍然如沈疴之去體也將來軍食就地取資全局既振制用自紓我

皇上保大定功規模宏遠上與

高宗拓地節餉之貽謀若合符節矣惟是新疆擬改行省設郡縣雖久安長治之良圖然事當創始關繫天下大局非集內外臣工之遠猷深算參考異同則思慮未周籌策容多疏誤且甘肅荒瘠著名所有兵餉全資各省協濟相沿已久前奏請

飭戶部將咸豐年間報銷冊籍全分頒發到以憑稽考尙未見到現復逐加訪詢及甘肅本省鎮迪一道餉需經費每年常額三百二十餘萬兩內外伊犁塔爾巴哈臺吐魯番南八城滿綠各營餉需經費約尙需百數十萬兩均係由各省撥解接濟此時雖指西征臺局及各省關專款分解濟用將來應仍復舊額以歸有著合無仰懇

皇上天恩飭下軍機大臣總理各國事務衙門六部九卿及各省

督撫將新疆應否改設行省置郡縣從長計議具奏請

旨並將各省關從前應解甘餉及應解新疆額餉各實數咨部核對行知庶_○斟酌損益得有憑藉見在南路八城雖復所有屯墾撫輯善後一切事宜需用甚繁均由_○軍餉內隨時挪墊_○不敢另款請銷各省關遵照部章均解至八成以上_○亦斷不敢格外請益至如南路陝區全復凡可爲開源節流計者_○自當殫誠竭慮慎以圖之務求弊去利生以益大局愚昧之見是否有當伏乞聖鑒訓示施行

請變通部章廣搜人才摺

竊維治亂安危雖關氣數而撥亂反治扶危就安則必人事有以致之人事既盡雖氣數之天亦退處於無權而旋轉之機始有可驗者所謂干戈起而文法廢文法廢而人才出人才出而事功成也安常習故時刀筆篋篋之士奉行例案亦可從容各奏其能至事故疊生則非其人其材不足以當之矣天之生才不易人之應

運非偶古今以奇才異能著聞而大名盛業足重當時傳於後世者亦有幾人苟能補救世局卓然有所表見卽不得謂非一時之選然卽此已不易得矧時會方殷待人而理需才之亟且衆如今之陝甘甚於各省今之新疆又甚於陝甘豈可刻以相繩也將營廣厦預購衆材將合羣力必呼邪許不蓄三年之艾何以治七年之疾不挈舊識侶伴何以爲萬里之行乎將士遠道從征勞苦過於內地又皆昔時謫戍之鄉其于役也艱苦其稱名也又非甚美所以爭赴前行矢效死力者感

朝廷豢養之久體念之深兩次

允頒部款又適當征軍待發之際將士懷忠抱愨急於赴敵求紓宵旰憂勤是其明效論功請獎何獨不然近來保案過多亦何嘗不以浮濫爲慮特用兵日久戰事又多保獎稠疊旣不容已則奏咨兩案不得不寬局外雖詫其多局中則猶覺其少也溯同治

五年二月欽奉

諭旨從前南省勇丁以甘肅地方瘠苦多不願往若將調赴甘肅勇丁酌增餉銀若干或再將員弁勇丁之從征西路者變通章程從優保舉當可樂於從事益加奮勉等因欽此臣入關度隴奉以周旋罔敢失墜軍行寒苦荒瘠之區復當兵燹之後物產既絀陸運又極艱難正餉外須分途設局採運軍火軍械糧料草束棉衣單衿巾履以及軍中必需之件非別籌經費採運不可非別籌津貼不可客軍餉需由各省給領者越境以後該各省只肯照舊供支額餉軍數本薄軍糧馬乾駝乾爲數極微萬難敷衍又非由別籌津貼不可是甘肅新疆與各內地情形本不相同也採運勞費既與各省內地懸殊而又非人不理非才不辦則勞績之優絀亦因之有異者勢所必至部臣意在示限制拔眞才致多駁劾是不揣其本而齊其末也外聞之礙難遵照理有固然揆諸重內輕外之常經外僚自應恪遵部議以收和衷之益漢臣諸葛亮所謂臣嘗罰臧否不宜異同也臣於部章固不敢堅持異論然遵照辦理

實苦窳礙難行伏懇

天恩飭下吏部兵部甘肅新疆保案從寬核議照甘肅現行州縣
補缺部章酌予通融以廣搜人材期收實效但令拔十得五機時
局必有所裨部。於外省彙保各案奉

旨交部議奏者按照新章分別准駁本其職分所當爲至已奉

旨允準見諸施行部。但當欽遵辦理不可再加指駁否則部章
轉尊於

綸綍事近顛倒實非所宜恐啟下陵上替之漸往代封駁之事以
黃門給諫任之亦緣階遠秩卑非若親近大臣地逼勢疑可比故
令制御史風聞言事給事中主封駁秩仍五品可覆按也唐臣顏
真卿謂朝廷紀綱須其存立。故不能無言應懇

飭下部臣一併熟思審處以免自干咎戾伏候

聖裁。因部章難遵體制宜慎起見據實陳明伏候

聖鑒訓示施行

流寓種人應遣回國布魯特部落准附中國各邊陲應築邊牆摺
 竊前據劉錦棠續報克復西四城後所有安集延賊黨及陝甘新
 疆各逆回均已搜捕誅戮淨盡惟葉爾羌城查出英吉利商官阿
 布都色買提一員隨帶喀什米爾等商人九名又有乳目國洋操
 教頭二品商人三名阿刺伯人三名和闐各城查出溫都期坦人
 十餘名鄂勒推帕人二十餘名克什米爾人一千七百餘名拔達
 克山人三千餘名巴爾替人一千餘名科拉善人一百五十餘名
 哈普隆人二百一十餘名據英國商官阿布都色買提稱係倫敦
 人三年前同夥三人販貨來新疆銷售前年歸去一人上年九月
 聞官軍至阿克蘇又歸去一人現存餘賸貨物約只十分之一劉
 錦棠飭令封存出示店門禁止兵民侵奪一面催阿布都色買提
 整裝歸國阿布都色買提謝保護之德求俟春融起程其乳目國
 徧查紀載無可引據據洋操教頭自稱該國距新疆一年路程在
 俄英兩國之西素以礮火見長帕夏因圖自強特用重金延請伊

等東來教習洋操隊伍陣式並演放後膛開花大礮此次官軍進剿目覩軍威實深悅服該教頭等與阿刺伯人均求給予文憑春融回國劉錦棠許之至溫都斯坦各國本印度地方佛經所稱痕度生毒均印度轉音克什米爾各國皆西方種類有前數十年貿易流寓西四城者有安夷竊踞時始由各國東來者劉錦棠以該各部衆數千既未助逆抗拒官軍且貿易爲業不習戰陣殺之不武應卽仰體

皇仁概免誅戮傳諭各頭目暫准照常安居造橋呈驗惟不許擅便出入致干盤詰其伯克胡里所造怕夏大塚卽予平毀其西四城舊有卡倫皆附各城數十里百數十里內安設卡倫以外則布魯特十九部落錯雜而居在喀城西北者五部落蘇勒圖察哈爾薩雅克巴斯薩爾巴噶什其名也不知何時投附俄羅斯其冲巴噶什希布察克提衣錦圖爾額依格爾岳百什額德格納色勒庫爾奇里克胡什齊諾依古特薩爾特奈曼喀爾提錦蒙額勒德爾

十四部落向附安集延劉錦棠到喀城後各頭目陸續來見仍願歸附中國續據呈報請示前來 維西四城地處極邊從前西方各部落往來貿易者間出其途道光間英吉利商人卽有由烏什阿克蘇經過赴伊犁邊外之事曾見奏牘其明徵也惟從前不過行商偶爾假道無流寓雜處者自阿古柏竊踞以來招致通商各部落種人口增遂皆視阿古柏爲東道主矣若輩既未助逆抗拒固可免誅惟久與回部錯處異時呼朋引類邊衅易啟致費周章應查明分別辦理願歸故土者仍放歸各部落一任翔泳故區其願留中土者准於關內安插庶可杜其勾結之萌查喀城形勢介葱嶺支幹之中安集延布魯特地居西偏踰山而東乃達喀城故各部落入喀動稱過山本中外天然界畫若南自英吉沙爾北至布魯特界按照卡倫地址改築邊牆於衝要處間以碉堡則長城屹立形勢完固界畫分明尤爲百世之利至乳目教頭英國商官均准給文回國布魯特十四部落仍願歸附中國姑如所請自此

應亦稍識兵威矣此西四城克復

皇威遐暢西方遠近各部落種人之舊時流寓新來游歷者莫不震動恪恭託爲創見差足上慰

宸衷謹一併據實附陳伏乞

聖鑒訓示施行

官軍克復西四城新疆肅清摺

竊維南疆自克復東四城進規西四城總理行營營務處候補三品京堂劉錦棠派提督余虎恩黃萬鵬分路先進喀什噶爾自率各營扼葉爾羌和闐衝要十一月十三夜余虎恩等克復喀什噶爾追剿竄賊十七日劉錦棠克復葉爾羌城繞英吉沙爾赴喀什噶爾收撫和闐大概情形已於正月初七日附報並聲明所有復城殺賊詳細情形俟劉錦棠到喀什噶後具報到當卽露布

上

聞茲據劉錦棠抵喀什噶後馳遞捷報前來覆核確實謹爲我

皇上敬陳之方劉錦棠定議三路進兵也志在掩賊不備取疾雷下擊之勢故未俟張曜全軍並赴先率所部進瑪納爾巴什逕擣葉爾羌英吉沙爾兩城以遏竄路西策應兩路進規喀什噶爾之軍一面商派張曜助勦之馬隊由烏什繼進以厚西路兵力上年十一月十五日劉錦棠師至阿卽格爾遇安集延騎賊百餘斬之訊知踞葉爾羌各逆尙不疑官軍遽至也疾驅而前十七日午間抵葉爾羌踞城之賊已於先夕聞阿卽格爾之敗遁去矣劉錦棠入居安夷所築新城派道員羅長祐提督譚拔萃搜除餘逆安撫繹回自率馬步繞道英吉沙爾會師喀城適接余虎恩喀城馳報則已於十三夜克復喀什噶爾擒斬甚衆分管留守復出城追捕竄賊劉錦棠將大概情形馳報後二十日派總兵董福祥率所部畧定和闐自率馬步倍道向英吉沙爾比至英吉沙爾則城內之賊已隨伯克胡里竄喀城城外八柵纏回二千餘戶伏地乞撫見伯克胡里所殺漢民三百數十人屍體枕藉道旁詢之纏回則

伯克胡里以何步雲等據漢城反正仇恨所致也比飭繼回掩埋並告羅長祐譚拔萃速捕葉爾羌和闐逸賊仍卽策馬前行二十日申刻抵喀什噶爾適余虎恩亦於是日收隊回喀什噶爾詳詢一切並提訊生擒各賊始得其詳方兩路分路進兵也劉錦棠以道里遠近程途險易計之應於十一月十四日齊抵喀什城余虎恩黃萬鵬率各營星夜疾馳十三日午刻黃萬鵬所部已抵喀什之北麻古木余虎恩所部已抵喀什之東牌素特相距六十餘里彼此商議賊攻漢城甚緊當急起援之是夜三鼓兩軍齊抵城下見城內火光燭天城外賊騎徧布余虎恩即由城東中路進督蕭元亨由左提督戴宏勝由右總兵桂錫楨副將夏辛酉率馬隊出左路之左提督陳建厚總兵張宗本出右路之右號鼓齊鳴馬步如牆而進賊衆倉皇棄各卡壘跳走將士奮威衝殺殲斃已多一股賊騎千餘逕向中路猛撲賊首正指揮衝突忽爲步隊矛戮墜馬斬首以獻訊之擒賊指稱白逆之副元帥王元林也步兵

壓逼而前騎兵張兩翼圍之此股遂殲除淨盡時城西北隅騎賊步賊三四千正奔救東而之賊忽聞北路號鼓齊鳴則黃萬鵬張俊已率所部馬步各營奮威馳至余虎恩督衆力戰據守漢城之前峒喀什噶爾鎮標中營守備何步雲前喀什噶爾糧餉回務章京英詔前峒喀什噶爾城守營守備楊世統憑城吶喊助勢羣賊恟懼失措開西城門出竄圖與城外之賊合併狂奔時天色猶未明也余虎恩黃萬鵬以士卒苦飢下令傳餐適何步雲等率百餘騎前來據稱十三日申刻賊騎探回報稱大兵至矣安夷所裹纏回聞知先潰夷目禁殺不止白逆之黨及所裹烏魯木齊吐魯番回衆尙留城東伯克胡里及陝逆于小虎所裹西四城纏回留城西北而白逆則已向西北竄走伯克胡里已向正西竄走其給諸賊留後者欲暫綴官軍俾其眷口輜重得以善脫也余虎恩與黃萬鵬商賊既分竄官軍自宜分道急追遂留張俊步隊守城飭何步雲等及喀城回日辦行糧備裹帶天明黃萬鵬率向西北追白

逆余虎恩率隊向正西追伯克胡里及于小虎十五日余虎恩等追賊至明要路及之擒訊落後賊供此股賊衆一千五六百人均關外將回遣犯伯克胡里令于小虎帶領斷後護眷口者伯克胡里已同賊騎四百先竄矣余虎恩令桂錫楨夏辛酉張宗本陳建厚各率馬隊由捷徑疾馳截賊去路自督蕭元亨戴宏勝步隊躡追前後夾擊賊勢披靡都司余福章軍功馬德海陣擒于小虎西征馬隊陣斬哈密叛回藍得全此股賊衆殲除淨盡余虎恩派戴宏勝押解于小虎及逆眷四百餘口回喀擬率隊窮追適布魯特回子來報伯克胡里已於昨日竄過此時計抵過路峽距俄國窩什地方不遠俄國早派多人在彼照管俟伯克胡里到卽收取軍械放入界內訊之擒賊供亦相同余虎恩以伯克胡里既竄入俄界未便窮追而白逆向西北竄走必由恰哈瑪經過由明要路至彼計程不過三百餘里橫截而出應可攔頭遂擬舍伯克胡里不追與黃萬鵬合勢追白彥虎黃萬鵬十六日追賊至岌岌槽已與

賊之尾隊相值正揮軍掩擊間適余虎恩所遣蕭元亨步隊亦到合力縱擊旌善右旗生擒僞元帥馬元西征馬隊斬其副白彥龍此股遂盡訊據生賊供白逆十五日早由此經過黃萬鵬蕭元亨令各營馬隊露宿作食是夜五鼓拔隊再進黃萬鵬先發蕭元亨繼之行三十餘里黃萬鵬隊伍甫過忽山溝內騎馬持械一股人數約五六百蕭元亨疑爲白逆然諦視裝束却與賊殊急遣人告知黃萬鵬返旗夾擊此股亦按隊不動遣隨行通事向其探問乃知爲俄屬布魯特部衆所稱黑勒黑斯者也詢其在此何爲答稱我頭目派來放卡知中國有人由此過路故來看視頭起過去已遠矣告以過去者係賊頭白彥虎來者係中國追賊之官兵答稱地屬俄羅斯界非先知照不得便過如要擊人非頭目自行網送不可問頭目何在答稱在納林河距此尙數十站也問此間有無頭目答稱無之餘均信口支吾無從究詰蕭元亨俟黃萬鵬折轉商議以奉令追賊未便於事外別起衅端且就地屯紮轉報余虎

恩以取進止余虎恩亦謂有此停待賊去更遠前進無益聞總統不日可到喀城且輕騎詢商再定劉錦棠到喀什噶爾是日余虎恩亦卽馳至詢悉各情並訊據生擒各賊僉供白彥虎於秋杪已遣甘回馬壯齋所掠金銀貨寶由俄屬布魯特赴俄國買路求生至今未回此次一聞官軍驟至卽與叛弁前瑪納爾巴什守備馬振成甘回索老三黑寶才馬良會等先行竄走至伯克胡里平日諂附俄人較阿古柏海古拉之厚結英人有加此次竄入俄界雖未謀之白彥虎而其求生覓路用心則同又據購派偵探賊縱之布魯特回子陸續報稱白彥虎一股竄過恰哈瑪克時正值大雪凍僵無數餘一二百騎於十一月二十四日抵俄界納林河橋俄人收其軍械放令過橋而去此伯克胡里白彥虎均由俄屬布魯特竄入俄境俄人納之之實在情形也劉錦棠又接據派赴和闐提督董福祥馳報十一月二十九日由葉爾羌馳抵和闐安集延踞城之賊尙未竄盡聞官軍至駭而奔董福祥飭提督申道發副

將田九福參將杜錫斌分路追捕斬馘甚多生擒安夷頭目達的罕條連和洛巴什俄波土回僞元帥常世和王孝友等三十二名諭撫和闐城鄉頭目令各安堵十二月初二日回民報安集延賊五六百騎踞城南五十里地方董福祥馳往剿之賊列陣抗拒官軍整隊衝擊賊敗走躡追三十餘里陣擒胖子提賽伊德買賣克令等大小頭目四十餘名及夷衆三百餘名次日搜山擒獲二十餘名並令各鄉纏回縛獻來營次第斬決和闐肅清羅長祐經過葉爾羌時據纏回報沙雅爾漏逸之麻木爾及原踞喀城大通哈哈的胡里及胖子提吐巴的奴爾巴易等糾黨二百餘人與和闐逃去安夷百餘人合股希圖竄出南口比商同譚拔萃派陶生林率所部威營馬隊及親兵小隊馳往追捕十一月二十六日生擒麻木爾哈的胡里吐爾的奴爾巴易等犯並陣斬七十餘名葉爾羌餘氛亦靖劉錦棠查喀城後復怕夏阿古柏眷口親屬經官軍衝散有伏匿近地者派馬隊帶布魯特本地回民分途搜覓陸續

擒獲阿古柏第五子引上胡里年十九歲並其子一僅止兩歲第
六子邁底胡里年十四歲第八子七歲九子四歲均無名阿古柏
女二一四歲一二歲伯克胡里一子方三歲均監禁候辦阿古柏
在喀聚婦三伯克胡里聚婦一訊皆新疆漢回之女擬飭其親屬
具領擇配又查獲同治三年勾引阿古柏入喀之逆回金相印父
子訊明追提同于小虎馬元兩逆目一併磔誅梟示喀城此外安
夷陝逆大小頭目及各悍黨經派隊捕獲回民縛獻訊明正法者
共一千一百六十六名奪獲後膛進子開花大礮七座開花螺絲
銅礮四座前膛進子開花銅礮百餘座戰馬一萬數千匹鎗械之
多不可數計此收復葉爾羌和闐英吉沙爾喀什噶爾四城追勦
竄賊擒斬大小頭目賊衆奪獲鎗礮馬匹實在情形數目也 維
安集延怕夏阿古栢本浩罕別部一胖色提耳同治三年布魯特
叛魯思的克等肇亂喀什噶爾逆回金相印父子勾引過山圍攻
喀什噶爾城破之遂竄食南八城恣其饕虐浸假倨吐魯番佔烏

魯木齊盜我腴疆儼然自大結強大之異族爲外援納兇頑之叛
斷爲內助迨

天戈西指連下名城奪其險隘誅其黨羽鼠技已窮蠹封遂潰遂
仰藥自盡倖免刑誅逆豎海古拉負屍竄走又以爭立爲其兄伯
克胡里中途所殺伯克胡里昏駸成性兇悖殊常仍思竊踞邊城
苟延殘喘迨官軍深入經危須以抵焉耆渡泐澤而掃烏壘復由
龜茲逾姑墨而抵溫宿尉頭東四城次等克復伯克胡里尙無所
聞仍以外援爲足恃西四城終可相庇以安聞和闐伯克呢牙斯
揚言反正急率喀城賊騎五千由英吉沙爾出葉爾羌和闐之南
攻之呢牙斯與戰不利並失和闐逆燄復張時官軍已連克東四
城矣逸賊以報伯克胡里乃留其大通哈胖色提等分守葉爾羌
和闐自率騎賊後由英吉沙爾返喀什噶爾然猶謂官軍多南人
不耐冰雪冬令必不遽來屬守葉爾羌和闐賊衆嚴扼兩城俟旋
喀後益派騎賊前來助力預防官軍春間進隊嗣聞喀城守賊馳

報何步雲等據漢城遙應官軍始許白逆助攻漢城自效不知白逆九月底竄至卡里他亞以兩克爲阿里達什拒卻時已嗾其黨馬壯賄通俄屬布魯特爲預投俄界之計故一聞官軍兩路倏到雖恟懼失措而坦然由之給其黨留抗官軍掣隊向西北迅竄蓋賊計固早辦一走自謂有恃所以無恐也伯克胡里則以素結俄人已早向其乞地容身雖與白彥虎各不相喻而希圖得過納林河爲幸彼此固有同情 閱劉錦棠所錄賊供及何步雲等所述賊情與余虎恩黃萬鵬所報追賊情形而知其詳余虎恩黃萬鵬等十三夜夾擊留拒之賊擒斬畢事時已四鼓不辨賊蹤所向比天明踞蹤分捕窮日夜之力始追及兩逆殿後之于小虎馬元等股一鼓殲旃若前途無容納之事無遮阻之人白彥虎伯克胡里兩逆固無難生致麾下以竟全功不幸事與願違竟致漏網據劉錦棠轉稟諸將士忿氣勃發請仍分路追勦務期罪人斯得劉錦棠亦義忿填膺願率所部與其周旋求仰副

朝廷除惡務盡之意。籌維再四伯克胡里亡國逆豎譬若孤豚白逆敗滅殘魂譬猶腐鼠雖覓路逃竄同惡無幾死灰何能復然俄邊雖已任其闌入然所屬布魯特人尙有可由頭目押送之說兩逆闌入納林橋邊時俄官亦令先收軍器或意在縛送以敦睦誼或遣人隨地歸定約留伯克胡里而獻白彥虎均未可知惟過納林河橋俄國地方究竟何官管轄無從查詢行文向索應否飭下總理各國事務衙門向俄國公使理論如將白彥虎及馬壯等逆交出固見友邦厚誼亦有以慰諸將士之心否則諸將士戮力行間不惟坐失全功且難免縱寇之恥深恐嫌隙一開將來爲所欲爲難保無尋衅生端之日愚陋之見如斯伏候

聖慈酌度至此次克復四城未逾一月廓清二千數百里斬獲極多在事文武將弁著有微勞應懇

天恩加以甄叙其死事各員均係血戰捐軀深堪憫惻應懇

天恩飭部從優議卹以慰忠魂所有官軍克復西四城新疆南路

一律肅清首逆未獲詳細情形謹合詞恭摺馳陳伏乞

聖鑒訓示施行

光緒四年二月初二日

覆陳新疆情形摺

竊臣於十月十三日承准軍機大臣字寄光緒四年九月三十日

欽奉

上諭一道跪聆之餘敬悉

皇上保大定功慎終如始審時度勢策及萬全至意敢不畢獻其

愚仰俟

聖明採酌伏讀

諭旨伊犁在昔爲西路第一重鎮俄人交還以後如何防守未交以前如何布置伊犁九城縱橫相連大城西南北三面舊有卡倫距俄境若干道路俄軍紮至何處金順現駐庫爾喀喇烏蘇前隊西至何處臣謹按俄人自據伊犁於西面舊有拱宸瞻德廣仁塔勒奇四城均棄而弗守傾圮殆盡綏定一城近以之雜置陝回距

伊犁僅三十里伊犁大城人烟甚少俄兵及商戶均萃居東面惠甯熙春甯遠三城而金頂寺烟戶尤多伊犁管事俄官名馬依爾品秩不過中國同知通判之類主伊犁之事者七河巡撫也七河亦作七水其官爲固必納土爾其名爲喀爾伯科斯克伊所駐阿爾瑪圖地屬俄境在伊犁西八百餘里其兼轄之官名圖爾齊斯坦總督名爲克復滿亦呼高伏滿自稱代國大臣駐浩罕故都塔什干城距我喀什噶爾不過數十程由喀什噶爾至俄邊納林河中隔俄屬布魯特部喀城馬行六日可至從前伊犁本不與俄境相連以哈薩克布魯特種人與浩罕所部安集延及布噶爾所屬爲隔閼近年俄人先後脅誘哈薩克布魯特種人又攻奪浩罕三部據其都城而浩罕屬安集延亦隨風而靡故我北路伊犁南路喀什噶爾之邊境皆與俄屬相接距俄境亦近也伊犁收還以後應於邊境擇要築壘開壕安設大小墩位挑勁兵以增其險至伊犁大城西北之塔勒奇廣仁瞻德拱宸各城戶口鮮存水草却便

應各擇要隘暫駐各營分屯其間所有旗綠各營剩存兵丁各給牛種牧畜督令游牧耕墾舊有城堡緩議修復尙非不可大城以東惠甯熙春甯遠各城民戶商戶願遷徙者遷徙願歸業者歸業邊圍旣奠人安其土耕其野而出其途者不待招徠迥非甘肅從前東路西路數百千里蒿萊滿望杳無人烟難於措置可比若烏魯木齊所屬各城相距甚遠難於照料此伊犁收還以後情形也伊犁未還以前金順大軍駐庫爾喀喇烏蘇其西精河地方勢處要隘向駐馬隊以資扼截自福珠哩歸後金順未及派紮填防致被漢回侵掠金順旋派馬隊二百前往填防當可無虞由精河西行一日爲永集湖再西數十里卽伊犁俄官所設之頭卡三日卽抵伊犁中間山徑五道可達伊犁不由惠甯熙春甯遠三城經過然巖谷幽邃僅容一人一騎行走不能通車若收還伊犁則驛道山徑皆成腹地此形勢變遷俄人現在布置官軍防守及距伊犁道里遠近大畧也

諭旨郡縣之制以民爲本現由嘉峪關烏魯木齊至庫爾喀喇烏蘇迤西商戶回戶各存若干由吐魯番至南八城纏頭共存若干除舊有各廳州縣外其餘各城改設行省究竟合宜與否倘置郡縣有無可治之民不設行省此外有無良策謹按新疆之變起於北路迪化失守所屬相繼淪陷戶口傷亡最多漢民被禍尤酷以逆回仇視漢民故也比大軍進剿連拔堅城而昌吉呼圖壁綏來回民又因畏勦逃奔南路烟戶頓減克復以來還定安集招徠開墾戶口漸增迪化州各屬尤成效可睹舊額民戶共四千二百有奇現報承墾者已三千六百餘戶昌吉縣民戶舊共三千九百有奇現報承墾者僅四百數十戶阜康縣民戶舊有三千九十餘現報承墾者僅二百一十餘戶綏來縣民戶舊有三千七百餘現報承墾者八百五十餘戶奇台縣舊有民戶四千三百六十有奇現報承墾者五百七十餘戶濟木薩縣承所屬舊有民戶二千八百有奇現報承墾者三百五十餘戶呼圖壁巡檢所屬舊有民戶

一千七百三十有奇現報承墾者二百八十餘戶庫爾喀喇烏蘇
舊有民戶僅八十有奇現報承墾者尙數十戶精河舊有民戶四
十有奇現報承墾者一百餘戶鎮西廳戶口無考舊種地六萬畝
現報民墾三萬六千餘畝兵墾四千餘畝土客漸增此北路民戶
現存實數也久罹兵燹戶口凋耗無怪其然鎮迪一道所屬雖子
黎僅存頻年散給耕牛種籽酌發賑糧廣示招徠自墨河抵精河
除戈壁外又均是腴區土客民人及遣散勇丁領地耕墾逐漸增
加著鎮迪道周崇傳勤慎廉幹事必躬親漸有明效需之時日百
堵皆興卽以目前論之亦非無可治之民也吐魯番舊隸鎮迪道
荒地尙少現委道員雷聲遠署同知奎拔妥爲撫輯糧石租稅已
逾舊額之半南八城除英吉沙爾壤地極小烏什土性瘠薄餘均
較吐魯番爲饒而喀什噶爾和闐葉爾羌阿克蘇庶而兼富物產
豐盈又較各城爲盛劉錦棠張曜悉心經理現委員開河引渠清
丈地畝修築城堡塘站鑄錢徵釐百廢肇興俱有端緒較之北路

尤易爲功是南北開設行省天時人事均有可乘之機失今不圖未免可惜此新疆之應改省者一也北路得之準部南路得之回部皆因俗施治未能與內地一道同風久已慨爲邊地伊犁設將軍又設參贊大臣一員烏魯木齊設都統塔爾巴哈臺葉爾羌均設辦事大臣伊犁等處設領隊大臣五員塔爾巴哈台烏魯木齊庫爾喀喇烏蘇古城巴里坤吐魯番烏什英吉沙爾均設領隊大臣哈密設辦事大臣一員協辦大臣一員葉爾羌設兼管和闡事務協辦大臣一員烏什設幫辦大臣一員喀什噶爾設換防總兵一員是邊地腹地皆一律視之無甚區別與經野馭邊之義不符將軍都統與參贊辦事大臣協辦與領隊大臣職分等夷或皆出自

禁閩或久握兵符民隱未能周知吏事素少歷練一曰持節臨邊各不相下稽查督責有所難行地周二萬里治兵之官多治民之官少而望政教旁敷遠民被澤不亦難哉北路糧員但管徵收而

承催則責之頭目南路徵收均由回目阿奇木伯克等交官官民
隔絕民之畏官不如其畏所管頭目官之不肖者狎視其民輒以
犬羊視之凡有徵索頭目人等輒以官意傳取倚勢作威民之怨
官不如怨所管頭目也內地徵收常制地丁合而爲一按畝出賦
故無無賦之地亦無無地之賦新疆則按丁索賦富戶丁少賦役
或輕貧戶丁多則賦役反重事理失平莫甚於此貨幣之制子母
不能相權爭訟之事曲直不爲徑達官與民語言不通文字不曉
全恃通事居間傳述顛倒混淆時所不免此非官與民親漸通其
情實去其壅蔽廣置義塾先教以漢文俾其略識字義徵收所用
券票其戶民數目漢文居中旁行兼注回字令戶民易曉遇有舛
誤卽予隨時更正責成各廳州縣而道府察之則綱目具而事易
舉頭目人等之權殺官司之令行民之情僞易知政事之修廢易
見長治久安之效實基於此新疆之應改行省者二也夫立國有
疆古今通義傳曰天子有道守在四夷周秦以前姑弗具論自漢

以來通道始於張騫不能得月氏要領求馬繼以廣利不能下小國堅城漢於西域窮天下之力以務之卒有輪臺之悔故班固以爲得之無益棄之不爲損也今主棄地之說者祖之愚非不謂然顧斷斷於兵不可停地不可棄者蓋以地形無今昔之殊而建置則有因創之異窮變通久因時制宜事固有不容已者謹按新疆開拓肇自

高宗時移涼州安西綠營兵丁駐守南北兩路餉不外增各城養廉原肅州河州安西綠營兵丁駐守南北兩路餉不外增各城養廉經費則以京口杭州等處出旗漢軍俸餉口糧馬乾及甘肅等處所減草料充之計內地每歲節省之數共一百二十九萬兩有奇而劃抵新疆養廉經費一百零七萬八千四百餘兩外尙餘銀二十一萬一千五百餘兩不特無糜餉之虞且有節餉之實論者竊以耗中事西疑之於

聖意拓邊節餉固無當也。自度隴以來卽留心稽考甘肅新疆

餉數僉稱承平時每歲約銀五百餘萬兩自變亂以來冊籍散佚難以覆按請部鈔示成案亦無以應近據藩司崇保詳稱查得道光二十七年甘肅口內外駐防滿州蒙古旗綠官兵應需俸餉紅白賞卹等事銀四百一十五萬二千三百五十三兩三錢九分九釐四絲一忽內先一年預撥銀一百四十萬兩外銀二百七十五兩二千三百五十三兩三錢九分九釐四絲一忽由部臣照依估撥預撥完數以此準之甘肅新疆實餉五百餘萬之數雖無可考而一歲之中預撥正撥四百一十五萬有奇則有數可稽也竊竊度南北兩路如行清丈之法就畝徵賦仿什一之制而從寬定額民收十數分官徵其一以給軍食尙可有餘修渠濬流以備旱潦改鑄制錢以便民用設局徵釐以裕課稅創設義塾教之識字選調匠師教之藝事自季春至今次第經理甫有端緒容俟各處緘釐取齊卽行具奏此外南北兩路物產尙有藥材皮張吐魯番之棉花和闐之玉庫車之金銅鉛鐵均應設籌及之是新疆利源非

無可開也甘肅地處邊陲土曠人稀瘠苦甲於天下承平時錢糧徵收不及東南一大郡此其明徵亂後子黎皮骨僅存氣息僅屬雖頻年拊循休養漸有起色究之致力多而成功少者時地實有以限之通省舊設額兵太多全恃各省協款接濟自中原軍興各省未能兼顧於是回禍起新疆淪陷甘肅全省名雖僅存而實則亡矣幸值

聖明在上洞囑無遺移東南之餘財救西北之奇厄親賢夾輔內外一心先關內而後關外次第圖之乃有今日不可謂非幸也此時所當亟籌者善後之策善後之策當規久遠利鈍所繫匪僅一時以甘肅與新疆並論新疆利原可開流亦可節甘肅則開源爲難而節流尙有可議從前額兵之多者一則轄疆與蒙部回番雜處兵少恐起戎心一則新疆需由內地撥兵換防兵少難敷調派也若以現在局勢而言蒙部回番已就鈴束防營可以漸減前奏改行餉爲坐餉圖節勇餉爲復甘肅制兵之漸新疆南北如置行

省換防之制可以永停又擬節制兵之餉以舒各省協款之力也竊計甘肅新疆承平時預撥估撥餉銀四百數十萬兩俟伊犁收還每歲約可節省百數十萬兩後此利源日增餉更可減部臣可隨時察酌而任甘肅新疆之事者可隨時陳奏特恐非微臣所及見耳此統籌甘肅新疆節省餉需以規久遠之大畧也

諭旨宜於萬難措施之中求一可進可退之計臣愚竊以爲新疆歲需餉銀三百數十萬兩甘肅歲需餉銀二百數十萬兩本是承平時部臣預撥估撥常例茲當全隴澄清西域收復之時照常指撥於部章並無不合承撥各省當亦無詞况承平時應撥數目內又可節省百餘萬兩此後經理得宜節省或尙不止此實於

國家經出之費不無小補當亦部臣與疆圻諸臣所樂聞也臣於新疆擬辦各事皆以利民裕國爲主行省之改與否尙未奏奉

明旨而所籌者無論改省與否兩不相妨可行則行可止則止進退尙屬綽然過蒙

聖明矜諒示以轉圜之機若不披瀝直陳上紓

慈念更何以自處至愚衷有未盡者不得不及時陳明仰祈

垂察。軍積欠之餉本八百餘萬兩頻年陸續清釐截至光緒四年尚欠一百數十萬兩近因飭道員胡兆墉息借商款遲遲未到劉典向蘭州票號借銀四萬兩又飭後路糧台道員王加敏息借漢商銀四十萬兩駐陝軍需局陝安道沈應奎息借票號銀二十萬兩暫應急需合之關內外新欠餉項及遣撤勇餉又積至二百數十萬兩將來胡光墉解到息借巨款除還陝鄂息借各款點綴新舊欠餉外所餘無幾縱極力劃留以備光緒五年應用之需夏末秋初又將告罄前奉

諭旨嗣後無論何項急需不得動輒息借商款致貽後累敢不悚遵惟念甘肅新疆軍務。既未嘗劃款請餉而一切經費又未嘗另款請銷如果此次借用商款外各省協餉均能源源接濟。猶可通挪展轉以期兼顧更何敢動輒息借商款干瀆

宸聰無如各省疆。身在事外但見西事速了此後需用或可稍緩而頻年悉索以來未免因煩生厭頻催罔應本屬人情之當而則勢逼處此莫展一籌將有束手待斃之日可否仰懇

天恩飭下軍機大臣六部九卿公同集議將甘肅新疆從前每年預撥估撥的餉四百數十萬兩指省解濟。軍並於現協。軍稍優各省酌撥解濟共足成五百萬兩之數以三年爲期。得於三年內盡心經理斟酌損益定爲永圖三年以後甘肅新疆軍務既蕩所擬開源節流之策亦必有成效可睹庶以前協款爲甘肅新疆用兵收復善後之需以後部撥爲甘肅新疆常例應有之款每年以三百數十萬兩爲度自無不可。本菲材疊荷

三朝恩遇忝竊至今當茲時難孔亟非不思仰體

朝廷憂勤惕厲之懷稍慰各省關頻施不倦之意願始謀未預晚蓋爲難所遇多艱綢繆鮮補雖有生之日皆報國之年而年近七旬神識衰鈍祇承

恩遇實切悚惶謹據實備陳是否有當伏乞

聖鑒訓示施行

光緒四年十一月二十三日

軍機大臣字寄光緒四年十一月初九日奉

上諭左宗棠奏復陳新疆情形一摺據稱北路迪化等處自克復以來招徠開墾戶口日增南八城地方富庶現辦開渠丈地鑄錢徵糧諸事俱有端緒開設行省於天時人事機有可乘等語新疆議設行省事關創始必須熟籌於事前乃能收效於後日該大臣爲長治久安之計因時通變所奏不爲無見刻下伊犁未經收還一切建置事宜尙難遽定其餘南北各城應如何隨宜經理之處卽着悉心籌畫次第興辦總期先實後名俟諸事辦有眉目然後設官分職改設郡縣自可收一勞永逸之效所有辦理情形並著隨時詳悉具奏至所奏三年以內每年請指撥銀五百萬兩俾得斟酌損益定爲永圖等語著軍機大臣會同戶部議奏將此由五百里諭令知之欽此

新疆圖志卷九十七

奏議七

圖冊 左宗棠六

陝回逃匿俄境分道寇邊截勦淨盡摺

纏回謀逆勦捕竣事摺

吐爾扈特仍歸舊土游牧片

安集延逆目糾衆謀逆勦捕藏事摺

布魯特安集延入寇進勦大捷摺

疊奉 恩旨出示曉諭摺

漏逸逆酋糾衆窺邊現籌防勦摺

賊酋犯邊進勦大勝摺

遵 旨開單報銷摺

敬陳新疆善後事宜摺

甘肅新疆防營承修工作請飭部備案摺

覆陳新疆宜開設郡縣疏

陝回逃匿俄境分道寇邊截勦淨盡摺

竊^正前據總統嵩武軍廣東陸路提督張曜馳報八月二十四日

烏什城西一百七十里雪巴里哇地方突有馬賊四五十騎竄至

又據阿克蘇西南五百一十里柯爾品六品伯克報同日由布魯

特竄來馬賊數十騎肆行劫殺立飭各防營出隊搜捕九月初三

日遇賊烏什西北三百里阿依他溝陣斬逆回二十二名奪獲賊

馬四十五匹生擒賊一名訊據供稱在俄境托胡瑪克種地受苦

賊目孫義合白彥虎金山商同出外搶劫孫義合金山在前約六

十餘人此係白彥虎夥內四十七人由托胡瑪克馬行十三日到

此旋據續報馬隊管官武朝聘及解餉委員周兆璋追柯爾品一

股馬賊沿途頗有擒斬賊由五台竄阿提黑兩克地方恰遇總統

劉錦棠所部馬隊迎頭截擊擒斬殆盡頃據劉錦棠馳報九月初

一日據瑪喇爾巴什營官記名提督李克常飛稟八月二十七日

接東二站圖木舒克台東三站車底庫勒台驛書渾巴什報二十

六日未刻有馬賊八九十騎由阿克蘇西北柯爾品竄至東四站雅哈庫圖克台戕斃柴草局員補用主簿歐陽紅驛書高清新及局勇驛卒五名附近纏回有死者是夜賊西竄至車底庫勒台戕害驛書二名搶去驛馬什物二十七日復折向東竄至色底克台搶去驛馬六匹李克常聞警立派哨官查春華副將劉長其率隊馳赴東路掩捕劉錦棠在喀什噶爾聞警以賊蹤一日擾及三台颯忽殊甚當扼其必出之路擊之九月初二日派提督楊金龍率馬隊百騎赴色底克台一帶提督譚慎典率馬隊二百騎赴瑪喇爾巴什一帶助李克常並咨商張曜派隊夾擊初四日李克常報稱查春華馳過各台未見一賊據巴底克台驛書吳耀南報賊蹤盡已北竄訊據被擄逃出之董姓子供稱賊騎百餘陝回居多亦有新疆人在內聞賊中商議將於夜間傍山而西覓路上竄卡勒克沁各台李克常親率步隊數十人向西路竄捕北至卡勒克沁則賊已先數時衝過戕害柴草局員守備彭福泰驛書王治安局

勇驛卒各一搶失驛馬十匹其領解寒衣之勇丁及遞送文書之驛卒共六名亦倉猝遇賊被戕賊向北路樹窩內竄走李克常追至樹窩賊竄又遠是夜收隊玉帶里克適揚金龍馬隊馳至會商留隊分紮玉帶里克卡及勒克沁屈爾蓋三台仍率隊由北面樹窩窮追而下途中接東路探報初一夜有另股賊百二三十騎竄至雅哈庫圖克二十里殺搶揚金龍即馳赴東路截勦李克常赴瑪喇爾巴什會隊夾擊初五日據喀什噶爾善後局委員同知王維國稟據阿奇木報八月二十日烏什西北三百餘里拜代里克竄出漢回一起二十三日又竄出漢回一起肆行搶殺均向柯爾品竄走與各處探報相符劉錦棠以此次竄賊行蹤忽於各處路逕恍若舊游當卽各城漏網餘孽見瑪喇爾巴什一帶官軍踞蹤急追不敢東犯非繞由喀什噶爾邊境速覓歸路必難善脫查拜代里克一帶出卡卽是俄境賊覓歸路當在乎此遂飭總理營務分統右軍道員羅長祐率總兵夏辛酉提督張宗本部馬隊三

百騎五品頂戴署喀什噶爾伊什罕伯克瑪木特帶領纏回布魯特馬隊六十騎提督段柏溪率所部步隊百五十名已革花翎都司何步雲已革藍翎外委何俊帶領防營步隊百五十名赴各邊隘要之初六日午刻羅長祐等啟行是夜次阿爾圖什洞賊於卡勒克沁繞竄北面樹窩復又上竄日馳二百里所過劫掠一空羅長祐初擬截賊於阿爾圖什北二百里之索封口五更得報賊已於初六日黎明由索封口竄過矣遂改擬向索封口西北三百餘里之沖壳罕截擊傳令馬隊卽行步隊留守一日夜馳四百餘里抵沖壳罕初八日天明登山瞭望瞥見騎賊由東結隊而來飭夏辛酉張宗本分伏山前山後以待令瑪木特帶纏回六十騎出陣誘之賊易其少挺矛躍馬衝出甫過山凹前後伏兵齊赴裏賊中央鎗轟矛刺短兵相接陣斬賊自賽屹塔卽碎屹塔及黑振江賊目金山棄馬而逸旋經布魯特人縛獻計陣斬悍賊百數十名生擒二十三名奪獲戰馬二百餘匹所搶駝馬衣服悉數收回械送

金山及生擒各賊赴喀什爾劉錦棠親提訊審據金山供稱伊等隨白彥虎住托胡瑪克地方白彥虎因窮苦難過商之馬良會赴俄官處領路票假稱赴逆首馬壯所居之鴨爾湖貿易爲出外搶掠計到鴨爾湖會馬壯黨夥分股繞過俄人所設之卡犯邊伊等係前一起頭目後一起頭目爲孫依虎馬家老二均約定飽掠後由此路同歸不料到此猝遇官軍馬家老二已經官軍陣斬惟孫依虎屍首未見又據供稱在精河一帶滋擾者劉士林一股人數多少伊等不知訊畢極刑處死傳首沿邊各地方懸挂示衆並准嵩武軍分統孫金彪報稱孫義合一股均陸續擒斬孫義合卽孫依虎馬家老二當卽馬良會均伏誅矣各山未被害之布魯特人等咸歡呼膜拜謝官軍保全之恩聲殷山谷此次寇邊之賊分起絕忽較尋常馬賊爲悍經官軍節次截剿擒斬共二百數十名並無遺漏掃除神速實足破賊膽而快人心並可張

國威而弭邊衅出力將士可否量加甄叙出自

天恩其陣亡遇害之花翎游擊銜陝甘補用都司蕭夢益儘先拔補把總張華發儘先把補外委石有元補用守備彭福泰補用主簿歐陽紅懇

恩飭部分別從優議敘庶士氣常新邊防日增鞏固於時局不無裨補至應還伊犁應交叛逆兩事等早與俄國七水巡撫圖爾齊斯坦總督商議迄無成局此次寇邊之賊由逃匿俄境之首逆白彥虎馬壯等指嗾所致生擒各賊口供僉同並於賊目金山身邊取出俄官所給路票兩紙其陣斬各賊隨身路票之未暇搜取無從呈驗者尙不計也維俄國邊官於新疆交涉各案屢持異議此次給與首逆白彥虎等路票致諸賊深入爲寇戕害我民人騷擾我台站劫掠我駝馬幸官軍速赴戎機扼要殲旃尙無損失前此圖爾齊斯坦總督來文言喀什噶爾應照約通商並不言照約交還伊犁與各總統以伊犁未還以前斷難遽照所請此次竟給貿易路票與白彥虎等致入寇犯邊橫行罔忌揆諸友邦睦

誼應否如斯將來攜帶俄國路票赴卡貿易者又豈足信乎茲將搜獲俄文俄記兩票咨呈總理各國事務衙門察驗應請

旨飭總理衙門照會俄國駐京公使知悉備案或不致如察罕葛根一案之事過無稽應否請

飭下欽差全權大臣吏部侍郎崇厚一併入議之處伏乞

聖鑒訓示施行

光緒四年十一月初三日

纏回謀逆勦捕竣事摺

竊准廣東陸路提督張曜馳報據阿克蘇城西南二百里之尹阿瓦堤地方回民三百餘人將該處稅局圍搶稅局委員從九何樹淵清丈委員縣丞官立朝及書職弓手親兵火夫共九員名被戕張曜聞警立派州同陳漪帶同在城商伯克哈查伯克及阿渾人等前往察辦一面調駐紮城南馬隊營官武朝聘率所部馳往勦辦并派馬隊營官秦玉盛李福雲等繼進爲其策應旋接武朝聘報十七日未刻至距渾巴什五六里地方遙見騎馬回匪六七

十騎蜂擁而來武朝聘督隊奮擊鎗礮之後繼以刀矛匪衆敗潰
陣斬十八名生擒十二名奪獲賊馬四十三匹賊衆分兩路逃竄
其向尹阿瓦堤竄走者武朝聘躡蹤追勦十八日追至尹瓦阿堤
沿途擊斃二十餘名生擒十四名并奪其馬各莊回民多已避匿
武朝聘會同委員陳漪招輯安撫其向東竄走者李福雲率隊追
至渾巴什河沿騎賊拚命泅水水深湍急得過對岸者僅止三賊
餘俱溺斃武朝聘解生擒各賊赴阿克蘇城張曜提訊內一名係
寄居尹阿瓦堤多年之安集延人名伊先和卓據供實未預知逆
謀訊之各匪僉供伊先和卓本不在場該匪等妄思假其名號希
圖裹脅安集延之人迫令同行非其本意當經省釋其被擒之阿
不都熱哈滿阿斯鐵千巴哈托胡達買提都拉木沙五犯續獲之
哈斯木卡哇買邁提巴哈西兩犯著阿克蘇阿奇木獲送之咬沙
哈拉阿西千沙他斯毛拉呢牙斯三犯均發交善後局員補用直
隸州知州龍魁候補知縣陳嘉績會同研訊據哈匪首供托胡達

買提及其弟古立買提起意謀逆本月十五十六等日與咬沙哈拉阿西於沙托斯毛拉呢牙斯等會商約俟事成各當頭目詐稱已約定黨夥數百人在葉爾羌河沿爲其內應羣賊信以爲真十六夜二鼓後古立買提咬沙哈拉阿西都拉木沙等帶同近莊二百數十人前往劫局局中員役九員名被戕次日復裹得百餘人齊赴渾巴什殺斃居民二人行過渾巴什數里遇官兵擊敗各自逃生陸續被獲其古立買提已於官軍圍拏緊急時掣刀自刎矣准張隴咨報前來查尹瓦阿提係嘉慶年間新開之地由各回莊遷移該處者原止一千戶嗣後生齒日繁分十大總莊數十年來仰荷

聖澤涵濡仁風翔洽同爲太平有道之民也久矣此次匪徒倡亂糾合馬步三百餘人公然執械樹旗自作不靖戕害局員肆行搶殺計距陝回突窺烏什邊境爲時不久蓋因陝回飄然忽至馳騁自如妄思學步不知陝回已經官兵擒斬畢事此次聞警星馳復

能出其不意也除陣斬斃逆賊不計外生擒六十餘名經張曜提訊將首要各犯極刑處死傳首起事地方梟示餘俱訊明分別辦理地方安謐如常其在事尤爲出力將弁勇丁可否附入截剿陝回案內酌予保獎恭候

訓示遵行其遇害之縣丞官立朝從九何澍淵應懇

天恩飭部議卹所有纏回聚衆謀逆經官軍勦捕竣事緣由理合恭摺具奏伏乞

聖鑒訓示施行

吐爾扈特仍歸舊土游牧片

竊臣前奉光緒四年正月二十二日

上諭金順奏吐爾扈特部落懇請仍歸喀喇沙爾地方照舊游牧一摺吐爾扈特人衆自遭兵燹以來寄往庫爾喀喇烏蘇情形困苦見在喀喇沙爾業經克復據稱福普恩克巴圖呈請帶領伊子布彥綽克圖并屬下阿拉巴圖取道烏魯木齊南山前赴喀喇沙

爾收集逃散人衆仍歸珠爾都斯地方照舊游牧自應准如所請以示體恤著左宗棠金順將該部落人衆設法安插毋令失所等因欽此祇領之餘敬仰

聖慈軫念藩部一視同仁至意竊查喀喇沙爾一城前被安夷陝逆掘開都河水淹沒已成巨浸迨經官軍收復廬舍蕩然無存比派員前往設局辦理善後撫輯流亡疏消積水修葺城堡并派各營分駐其間以資照護漸有成效可觀前奉

諭旨吐爾扈特人衆欲歸舊土游牧應卽設法安插當經恭錄咨會金順俟該福普等起程派員送至喀喇沙爾并飭沿途防營派隊護送設局支給食糧到喀後收集該部人衆飭由善後局及防營妥爲照料令其照舊在珠爾都斯地方游牧其貧苦不能自存者酌發賑糧俾免失所嗣據喀喇沙爾善後局委員補用知縣黃丙焜管帶防營補用知縣黃長周等稟報從前寄往伊犁之吐爾扈特人衆於九月間接踵歸來當派隊伍妥爲照護查點人數共

大小男婦七千八百餘名口均就開都河兩岸安插游牧惟其中能自食者僅三千餘名口餘均待哺噉黃丙焜等察看情形宣示

皇仁按日發給賑糧復業安居照常靜謐維吐爾扈特人衆自逆回肆亂分兩股奔逃一逃伊犁一逃西湖十餘年來轉徙流離困苦已極仰仗

朝廷威福邊圍肅清得歸舊土復領獲賑糧藉資存活感荷

皇仁再造有口同聲其吐爾扈特福晉恩克巴圖尙寄寓西湖稱俟喀喇沙爾安插竣事後卽率同餘衆一併歸來所有安插吐爾扈特人衆情形謹附片陳明伏乞

聖鑒訓示

光緒四年十一月初六日

安集延逆目糾衆謀逆勦捕蒞事摺

竊准通政使司通政司二等男劉錦棠咨稱本年十月初間

據喀什噶爾西南境各纏頭伯克及各布魯特頭目先後報稱上

年竄遁俄境之安集延目逆阿里達什由俄官處告假潛出帶同
默爾開里木和哲擁立迭位什罕爲條勒率安集延腓色提五名
玉子巴什及賊黨一百八十餘名竄至奈曼地方勾通該部布魯
特頭目阿不都勒哈瑪及其子買賣提斯拉木等種人三百餘名
謀襲喀什噶爾城池等語十月十三日探報賊衆擾至伊勒庫楚
卡倫外噉黨入塔什密里克莊分途糾集各布魯特十五日探報
賊衆擾至玉都巴什卡倫並分股入烏怕爾之瑪雜爾唸經散食
瑪雜爾者回子祖墓卽回衆所稱拱拜者也其煽惑布魯特種人
均假所立條勒名號爲詞謂漢人非其族類現聞喀什噶爾官軍
內調正可乘虛襲取條勒所到之處可免上糧納稅蓋襲用安集
延怕夏阿古柏先年闖入回疆時故智也劉錦棠聞報卽派知府
袁堯齡總理喀什噶爾漢城防務派參將劉必勝率隊移紮喀什
噶爾回城北門外以備不虞十五夜二鼓劉錦棠率提督譚慎典
方友升總兵夏辛酉各帶馬隊二百騎提督楊金龍張宗本湯詠

山各帶馬隊百騎飭喀什噶爾伊什罕伯克五品藍翎瑪木特爲鄉導向烏怕爾進發派道員羅長祐率提督段伯溪步隊三百總兵侯名貴礮隊三百已革外委何俊防營步隊三百提督彭明達曾楚南親兵二百帶同布魯特總管五品藍翎以尙胡里向烏怕爾繼進又派提督張俊率步隊兩營取道英吉沙爾之鐵勒克卡倫赴塔什密里克扼紮防賊分竄布置甫畢令赴烏怕爾馬步各隊銜枚急進定以十六日黎明齊隊是夜行一百五十里抵烏怕爾回莊瑪雜爾賊衆見官軍突至卽返走玉都巴什與大股合勢謀抗官軍劉錦棠令馬步隊伍搜查各回莊伏賊躡蹤急進馳三十餘里至玉都巴什瞭見迤南戈壁賊騎兩集約八百餘人立飭夏辛酉張宗本率馬隊三百先進譚慎典方友升率馬隊四百繼之羅長祐侯名貴何俊彭明達曾楚南率步隊一千又繼之自率楊金龍湯詠山馬隊二百左右策應夏辛酉張宗本麾隊直前賊排隊迎拒洋鎗父子鎗子如雨注夏辛酉張宗本率刀矛隊怒馬

陷陣斬執毛旂賊目奪其旗官軍謹譟乘之賊衆遂潰向南而山谷竄走夏辛酉張宗本督隊緊追陣斬三百餘名生擒三十餘名譚慎典方友升麾所部急進馳百餘里賊分竄山谷不見蹤跡是處爲布魯特遊牧地亂山叢雜難於覓徑未便窮追劉錦棠傳令停隊飭以尙胡里率所部布魯特馬隊百騎入山傳諭布魯特各頭目引路追勦違者斬劉錦棠當聞警之初預檄英吉沙爾葉爾葉各卡倫外布魯特頭目令各率衆赴奈曼會剿二十九日以尙胡里至奈曼回目庫彌什已率部衆四百餘人先伏山谷間適阿里達什經官軍擊敗率其死黨由此竄過庫彌什令其部衆四百餘人分起截擊殲斃殆盡中有裝束稍異者詢之帶傷賊黨知爲阿里達什並於身旁搜獲玉印之類遂割取首級同以尙胡里詣營報功劉錦棠驗視無異重加犒賞歡呼膜拜而去訊據賊供此起回目惟阿布都拉哈瑪父子敗後已分路翻山竄逸劉錦棠派隊窮搜無獲收隊凱旋其被阿里達什煽惑從逆之塔什密里克

烏伯爾兩莊回民據擒賊供稱及良民告發手持鎗械者約三百人已經官兵擒斬無遺此外愚回於阿里達什入境時或前往迎接或隨同唸經或餽送糧草牛羊人數無從確指劉錦棠以首惡既誅餘可勿問惟提塔什密里克伯克一名玉子巴什六名阿渾毛拉五名散人三十一名訊俱糾人從亂罪無可道均駢誅梟示以昭炯戒此次劉錦棠所部馬步各隊速赴戎機剿辦奮迅布魯特種人效順踴躍爭先陣斬漏網逆目獻之軍前俾免蔓延貽患均屬異常出力可否彙入前次截剿陝回案內一併保獎出自天恩其打仗陣亡之補用參將回疆肅清案內擬保總兵銜副將丁遠學千總擬保守備李富貴功擬保把總羅中英梁勝德懇恩飭部照擬保官階從優議卹此外傷亡勇丁容俟查明另案彙報

維阿里達什本安集延酋伯夏阿克古栢親信黨羽阿克栢服毒自盡後逆子伯克胡里赴阿克蘇與海古拉戰赴和闐與呢牙斯戰皆留阿里達什守喀什噶爾回城爲援應其明徵也迨換防

已革都司何步雲等反正奪據漢城阿里達什逐日引眾攻撲又
嗾白彥虎帶領陝回助攻經於上年十一月十八日

奏報迨官軍克復喀什噶爾阿里達什隨同伯克胡里窺匿俄境
之窩什地方此次由俄官處告假潛出煽惑回民圖襲喀什噶爾
幸劉錦棠於賊謀甫露之時聞警星馳勦除迅速俾邊圍無警布
魯特相庇以安不至蔓延爲患惟阿里達什爲中國漏網要逆既
遁匿俄境任其告假潛出糾眾寇邊揆諸友邦睦誼應否如斯現
在中國叛逆遁匿俄國者尙多似此紛紛竄擾防不勝防守邊將
士將無解甲晏眠之日積之久而心不甘實有難於禁約者應
請

旨飭總理衙門照會駐京俄使知照備案可否請

旨飭下欽差全權大臣吏部侍郎崇厚一併入議之處並候聖裁
謹據實馳陳伏祈

聖鑒訓示施行

光緒五年三
月初三日

布魯特安集延入寇進勦大捷摺

竊上年安集延賊首阿里達什勾通布魯特逆回阿布都勒哈瑪及其子買賣提斯拉木竄擾邊境經官軍擊敗阿里達什伏誅阿布都勒哈瑪父子翻山竄逸各情形經_臣於上年十二月二十二日馳報嗣准通政使司通政使二等男_臣劉錦棠緘牘並稱阿布都勒哈瑪父子敗竄俄屬阿來地方議投俄羅斯俄官令其暫居邊境阿都布勒哈瑪遂勾結寄居俄境之安集延酋愛克木汗條勒阿奇木汗條勒咬買提和卓再爲內犯之計條勒和卓者回部稱其教祖後裔之稱如中國之稱聖裔也愛克木汗阿希木汗二人本同胞兄弟即從前首逆張格爾胞弟玉素普之孫阿布都勒哈瑪之勾結愛克木汗者以其爲安集延酋長應與阿古柏報復爲詞其勾結阿希木汗咬買提者以其爲條勒和卓足令布魯特各部歸心也向三逆誣稱南路沿邊一帶有衆數萬許爲之助待汗與和卓到卽起事奪回各城愛克木汗等信之率其屬胖色提

二十餘人玉孜巴什百餘人所部安集延回衆八百有奇於上年十二月十三日徑抵烏魯克哈提地方俄守外卡纏回頭人布魯特頭人及回兵共二十八名被其虜去又脅誘正西西南一帶布魯特各部其不從者殺之至臘底聚衆已一千七八百人由烏魯克恰提而東三百四十里爲卡浪圭內卡再東六十里曰明約洛卽明要路距哈什噶爾城百里劉錦棠連接邊報賊氛漸近矣明約洛本哈什噶爾要隘劉錦棠原派總兵田九福步隊一營扼守賊不得過上臘二十八日遂繞向東南竄至畢勒套格依地方又以水草不足本年正月初一日復折而南趨至博斯塘特勒克地方卽希布察克布魯特比所居也其左大山綿亙其右山巒起伏中爲廣谷水草甚便出谷口東南行六十里爲烏魯阿提外卡有路可通色勒庫爾一帶再東二百里爲塔什密里克之伊勒庫楚內卡出谷口正東行百六十里爲烏伯爾之烏帕拉特內卡稍南爲烏帕爾之玉都巴什內卡地皆戈壁賊由畢勒套格依北來皆

必經戈壁惟博斯塘特勒克後面崗原錯雜草木叢茂由此西北行二百里爲阿依阿提外卡再西二百里爲卡拉阿爾提又一百八十里爲黑子裡拉提達坂逾此卽入俄屬阿來地界賊之踞博斯塘特勒克者以其爲布魯特比駐紮之處意在盡脅希布察克各野回部衆以厚其勢而協以謀我也劉錦棠詳考地圖稽諏各布魯特部衆而得其詳意以官軍前去必度戈壁戈壁平衍一望無涯賊得覘我虛實動靜預爲準備似此示形以致寇非計之得也須伏兵山谷待賊來擊之遂定四面圍攻之計五年正月初三日派提督方友升率所部二百騎進烏伯爾提督譚慎典率所部二百騎進玉都巴什駐營兩營相距三十里飭令分段偵明賊蹤隨時飛報又陰蹤卡內布魯特人投入賊中佯言官軍無多誘其深入初七日方友升報賊衆大至約二千三四百人游騎已擾至烏伯拉特近邊劉錦棠遂留知府袁堯齡督同總兵侯名貴率礮隊一旗親兵一哨守漢城總兵杜錫斌率步隊一營守回城先派

提督張俊督同提督胡登花石蘊玉率步隊千名由英吉沙爾取道圖木舒克以向塔什密里克限初十日午正到烏魯阿提防賊旁竄又派提督董福祥督同總兵田九福率步隊千名提督張宗本總兵夏辛曾率三百騎由喀什噶爾回城取道卡浪圭拔至無胡素魯克該處西距烏魯克恰提百二十里東南距畢勒套格依二百里以圖截賊來路並飭官軍到時或賊尚未折轉賊急近畢勒套格依駐營扼賊回竄皆令捲旗息鼓以行劉錦棠自率道員羅長祐營勇並喀城防勇步隊一千五百名親兵步隊一百六十六名馬隊二百騎於初九日黎明由喀什噶爾漢城啟行是夜接方友升馳報本日有騎賊三十餘直搗烏伯拉特卡當經擊退賊向博斯塘特勒克竄走並訊據獲回擒獲探賊供稱賊中傳令是夜由博斯塘特勒克來烏伯爾搶官軍營盤劉錦棠以賊由南路來地勢平坦一經官軍剿敗退竄歸巢地散路平官軍雖躡賊窮追未能多殺不如先取其巢待賊返擊之遂留參將劉必勝提督段

栢溪張復良李雲照已革外委何俊率步隊七百五十名紮烏怕爾莊外助同督勦派羅長祐率提督譚慎典方友升楊金龍馬隊五百騎小馬隊四十騎及提督張春發湯彥和張仕林彭明達曾楚南總兵彭禮堂把總張鴻疇步隊七百五十名是夜由北面小路銜枚疾走向博斯塘特勒克邁進約次日天明取齊巡搆其巢部署已定羅長祐卽率隊前進黎明行進博斯塘特勒克谷口守巢之賊方散布谷中熟睡未醒其驚覺者倉猝間覓軍械不及我軍馬步馳至鎗礮之後繼以刀矛斃賊五百餘名訊據擒賊供稱大股賊已於初更向烏怕爾去矣羅長祐令馬步各隊暫憩谷內飲馬作炊一面派騎四出偵探午間遙見戈壁東面塵土大起偵者回報賊由烏怕爾折回羅長祐令各隊偃旗臥鼓以待方賊之由博斯塘特勒克進勦烏怕爾官營也行至烏怕爾西南十里地方天尙未明其地在戈壁內久爲山水衝刷遂成平沙可容多騎賊停隊於此天明賊先率百餘騎巡撲烏怕爾官營劉錦棠聞報

卽令劉必勝何俊率隊先往擊之自率段柏溪步隊及馬隊繼進爲其策應又令張復良李雲照各率隊伍多張旗幟作爲兩路由烏伯爾迤左樹林抄出一由烏伯爾迤右山溝抄出均約於大股屯集處會隊劉必勝何俊之隊首與賊遇分左右進擊之賊騎百餘敗走劉必勝何俊方躡蹤追剿忽西南溝內大股騎賊紛紛結團衝出劉必勝何俊勒馬整隊以待騎賊分團更番來撲屹不爲動賊改用圓陣四面環攻洋礮又鎗子如雨注劉必勝何俊督劈山礮抬鎗洋鎗各隊層疊施放鏖戰正急何俊被子傷腦適策應各營齊至號鼓齊鳴聲震山谷小馬隊回馬隊先進段栢溪步隊繼之張復良步隊已由右面抄至李雲照步隊亦由左面抄至賊覩官軍馬步相依聲勢聯絡且層見側出不知多少未敢戀戰劉錦棠揮隊壓追三十餘里擒斬悍賊百數十名見賊仍向博斯塘特勒克返竄知其已墮計中從容收隊還至蘇巴什就水草紮營遣騎馳偵前途戰狀敗賊回竄博斯塘特勒克初十日午初卽

近谷口羅長祐令譚慎典方友升楊金龍等列馬隊於谷外令楊
彥和張春發等率步隊仍伏谷中自登左面山坡相機調度賊警
見官軍阻其前亦整隊拚死繼進每團約四五十騎前後兩股共
約四十餘團作連株勢與官軍接鎗礮對施半時之久互有傷亡
勝負未決羅長祐令各馬隊以長矛衝陣譚慎典率數十騎怒馬
挺矛直入賊陣遇賊卽刺斬賊首買賣提斯拉木於陣前賊陣大
亂楊金龍率隊由右路進方友升率隊由左路進各弁勇無不以
一當十殺賊以三百計賊既不復成陣分爲左右兩支右股多約
千騎急圖奔歸巢穴徑向谷右衝入不料谷中又已設伏也湯彥
和張春發等步隊見賊至突起鎗矛並進斬馘遂多逸賊棄馬翻
山羅長祐麾各營馬步緊追霎時擒斬盡淨斬賊首咬買提和卓
阿希木汗條勒於陣其左一支約五百騎敗後繞由谷外傍嶺脚
西竄圖出阿依阿提外卡譚慎典方友升楊金龍等率馬隊躡追
賊且戰且走譚慎典以一夜之力馳二百里直追至阿依阿提外

卡沾途殺騎賊三百餘並奪其馬羅長祐於是夜四鼓亦拔隊前進十一日午正抵阿依阿提令布魯特騎卒馳探令譚慎典等率馬步繼之囑以追至俄界卽止自駐阿依阿提以待十二日申時譚慎典等馳抵卡拉阿爾提據布魯特騎卒回報賊首愛克木汗條勒阿布都勒哈瑪共賸百餘騎竄過黑子里達坂已入阿來俄境矣譚慎典始收隊回此外敗賊之竄至畢勒套格依及烏魯阿提者經董福祥張俊張宗本夏辛酉馬步各營分投搜斬淨盡馬步隊伍均於十五十六兩日先後撤回原防綜計是役除陣斬賊首阿希木汗條勒咬買提買賣提拉木三名外並擒斬賊目胖色提十有七日買木時甘吉日塔什巴易日塔什伯克日開里木日土魯普日太呢胡呢日卜根胡里日塔什買提日買賣提胡里日亦司馬儀日遙子買賣提日呼土魯克日沙底克日沙悟的日哈生木日滿素爾日其詳比皆阿古柏舊人也玉孜巴什六十有奇其名難以盡悉綜計是役陣斬安集延賊七百有奇布魯特賊千

四百有奇奪獲鎗礮軍械馬匹駝隻無數其漏網之愛克木汗條勒阿布都拉哈瑪現竄俄境已飭沿邊各布魯特總管嚴密偵察其竄入俄境後俄官如何接待應俟劉錦棠偵探確實咨會到再行入告竊維南疆邊境與安集延布魯特諸回部壤地毗連犬牙交錯自戡定以來兩部常爲邊患亦由形勢迫切窺伺難防也彼中所號爲汗爲比者君長之稱所號爲條勒者教祖之裔皆部衆素所崇奉者也此次入寇由其汗與條勒號召而來故起事未幾糾集已衆幸劉錦棠調度敏速迅赴戎機於地勢賊縱隊如指掌指麾布署悉合橫宜所部將領士卒躍躡爭先復能整齊行列以靜制動用克乘其初起速就蕩平不致重煩兵力所履各戰地皆從前出塞之師未嘗經歷者此邊方諸部應亦稍識

天威計所殺之賊二千數百名而官軍陣亡者已四十餘員名受傷者已九十餘員名蓋亦血戰矣所有此次出力各員弁勇丁擬彙入前次截剿陝回及剿辦安集延逆回兩案一併保獎惟按其

功次擬保多有逾限制之外者應籲懇

天恩俯准分別列保以示優異其力戰陣亡之提督銜總兵李青雲總兵陳大根總兵銜副將沈煦階副將銜參將李春廷參將周桂蘭都司陳松廷孫祥吉守備王永朝守備銜千總龍碧雲千總張保林周喜祥王銓銜王益生把總鄒鳳玉朱有福沈福隆羅文燦陳仁十八員弁懇

恩飭部從優議卹以慰忠魂所有官軍剿辦安集延布魯特寇邊之賊出卡窮追陣斬逆賊渠目克獲大勝疆圍乂安情形謹據實馳

奏伏乞

聖鑒訓示施行

光緒五年三月初三日

恩奉 恩旨出示曉諭摺

竊 於光緒五年四月初七日承准軍機大臣字寄光緒五年閏三月二十四日奉

上諭崇厚奏遵查邊境滋事匪徒與俄國商辦情形一摺據稱逃匿俄界之回匪分道寇邊經俄國外部尙書格爾斯而稱此項人衆並非俄國之人路票內寫明地方係在界內不料其越界滋事現已知照各邊界認真查禁嗣後越界滋事之人任聽中國辦理等語卽著左宗棠金順隨時相機妥爲籌辦至照會中有中國將回人赦免准其回籍一節自係指未經滋事良善回民而言並著左宗棠酌度情形出示曉諭其首要各逆及怙惡不悛者固爲法所難寬其洗心遷善情有可原者自應分別辦理以示勸懲等因欽此

原維伊犁本準部故地乾隆間戡定以後番族浸微回部民人屬雜其間苗裔雜衆伊犁居人除旗綠各營及各省漢回商民遣犯外一爲纏回由南疆轉徙而來遂成土著一爲本地土回則伊犁各城舊有種族一爲陝回係近時官軍克復各城後畏剿逃避伊犁俄官實之綏定城要而言之纏回性多良懦本無悖逆重情陝回敗亡之餘避地逃生亦非別有詭計前聞陝回楊萬勝趙

全福等自伊犁來投金順令其轉相招致導以撫局其成與否尙未接據續報然其就撫固在意中茲聞伊犁交還日纒回陝回兩種當可無他惟土回被脅已久自恐難邀曲貸其心懷反側在所不免俄人之請將回人赦免准其回籍似專指陝回言之惟頻年辦理回案原係欽遵

諭旨剿撫兼施而陝西漢民與回仇怨既深就撫陝回萬難復歸故土故歷次辦理撫局概將陝回安插甘境其甘回之就撫者亦令遷移甘轄附近郡縣與漢民異處俾耦居無猜各得其所庶幾日久相安

諭旨飭臣酌度情形出示曉諭比卽欽遵出示並會伊犁將軍金順前銜恭錄徧行曉諭其洗心遷善情有可原者准分別辦理並咨行軍營文武凡繳認馬械傾誠就撫者入關安插不得留難阻滯以廣

皇仁惟示稿中於首要各逆及怙惡不悛者固爲法所難寬一層

未及備錄恐啟猜疑甫於四月十七日由驛分行馳遞旋於十八日欽奉四月初七日

諭旨伊犁回人從前被賊迫脅未能自拔情尚可原其被脅人衆概可從寬免罪予以自新著左宗棠明白曉示並飭帶兵員弁收城之日不得妄行誅戮以示法外施仁至意等因欽此遵於四月二十一日仍會金順前銜恭錄

諭旨曉示伊犁回民人等一體知悉安堵無恐勿得懷疑觀望自外生成各路帶兵員弁收城之日不准妄行誅戮致干軍律竊維兵事不外剿撫兩端而撫倍難於勦勦者一時利鈍成敗之分當幾可以立斷撫則恩信爲主非寬厚不足以示包荒而安反側之心亦非威權不足以示區別而爲久遠之計特輕重緩急次序攸分辦理偶失其宜則勸懲之用將有時而窮人雖至愚無不知貪生而畏死使其倖逃顯戮固貽異日隱憂使其因疑懼而惑衆生端尤慮變生不測智欲其深勇欲其沈固未能責其效於旦夕間

也臣當與金順慎以圖之

諭旨收城之日不准妄行誅戮各路帶兵員弁應卽懷遵惟受撫之際每因兵勇搜求財物致起事端尤宜嚴明紀律以免有所藉口臣當分別咨行轉飭各員弁一體遵照毋准違犯以明軍律謹將遵

旨出示並擬辦情形據實馳陳伏乞

聖鑒訓示施行

光緒五年五月初三日

漏逸逆曾糾衆窺邊現籌防勦摺

竊喀什噶爾今正大捷逆曾愛克木汗條勒阿布都勒哈瑪與敗殘餘衆數十人竄遁俄境阿來地方五月內被俄官驅逐該逆曾等因俄不見容遂由阿來竄出越愛克什塔木俄國邊卡踞我外卡之外以跟地方自言無地逃生卑詞懇諸安集延布魯特各回助其竊踞邊城暫延喘息回衆中喜事無賴之徒轉相勾煽加以誘脅從亂者漸多六月十七日竄至烏魯克恰提嗣後渡河而南

招致回部意在窺邊。接道員羅長祐緘告比於八月十一日覆陳摺內附叙及之旋接通政使二等男。劉錦棠七月十四日咨報所叙賊情賊蹤與羅長祐無異而布置一切較爲詳明按烏魯克哈提距喀什噶爾約七百里中隔戈壁由烏魯克哈提南竄則必出烏帕爾西南竄則必出色勒庫爾以兩地水草均便多產糧料人馬足供故也劉錦棠先派羅長祐率馬步赴烏帕爾修築堅壘留副將劉必勝步隊總兵夏辛酉馬隊駐守扼之飭西南沿邊各布魯特徙帳內地避賊裹脅劉錦棠按兵喀什噶爾擬伺賊所向急起擊之嗣復接劉錦棠七月二十五日咨報阿布都勒哈瑪由烏魯克哈提翻山而南向色勒庫爾窺走後兩日愛克木汗由烏魯克哈提踰河而南越買勒克蘇明特蓋等處復向西南竄走是其併趨色勒庫爾圍與阿布都勒哈瑪合股無疑劉錦棠派羅長祐率步隊三枝留守喀什噶爾漢城總理後路防守事宜總兵杜錫斌率所部董宇左營步隊駐紮回城並飭提督李克常副

將劉必勝等仍常駐紮以重邊防布署已定七月二十六日劉錦棠親率馬步二千有奇由喀什噶爾向色勒庫爾進發沿途如別無戰事計旬日內可到地接仗容俟續報到時再行馳

奏竊維新疆北路接壤哈薩克布魯特南疆則與安集延布魯特各部落毗連此次賊竄色勒庫爾地屬葉爾羌邊境在喀什噶爾西南種人雜錯其間最易煽動非迅予殲夷則展轉勾結必致重煩兵力劉錦棠料賊所必出之途而急起乘之者以此所幸賊蹤經歷皆山谷崎嶇官軍由卡內追擊道路稍夷如履衽席差爲得算至若新疆地方因俗施政教未行愚回信奉其汗比條勒已成鋼習非革除舊俗漸以華風望其長治久安事有難言者臣之妄擬改設郡縣亦以此擬俟北路底定再會議請旨遵行謹將逆酋窺邊官軍馳剿情形據實陳

奏伏乞

聖鑒訓示施行

光緒五年九月初三日

賊酋犯邊進勦大勝摺

竊布魯特賊首阿布都勒哈瑪安集延賊首愛克木汗條勒等率衆竄逼色勒庫爾通政使二等男劉錦棠親率馬步二千餘人定於七月二十六日啟行前往剿辦所有進兵情形經具奏在案茲准劉錦棠九月初二日來咨稱七月二十五日據色勒庫爾阿奇木伯克阿布都勒哈山等稟報前來探得賊股竄至蘇巴什地方距色勒庫爾祇有一站因飭伯克素唐夏等在城防守一面帶同伊什罕伯克米爾子咬克木等並居民二百出城扼紮蘇巴什南面該賊探知要隘已扼卽繞由間道踰嶺而來十九日大股已抵城下約三千餘人將城圍住祈撥大兵援剿劉錦棠以色勒庫爾城小而堅尙易固守但阿奇木伊什罕等均隔在城外恐城內各回目與居民不無驚惶該處設有疏虞勦辦較爲費手又以師行糧隨路險不能容車且閱沿邊布魯特各族被脅者多其尊崇條勒之教聞風響應者尤復不少自英吉沙爾出卡皆布魯特

支帳之所爲運道所必經難保中途無梗因飭各營裹帶二十日行糧並飭喀什噶爾英吉沙爾各局星夜雇驢裝運糧料一並飭行劉錦棠二十六日督隊由喀城啟行二十七日抵英吉沙爾適前調之管帶壽字馬隊提督陳建厚率隊前來卽飭暫駐英城次日復飭提督張俊提督石蘊玉辛定遠中右步隊兩營並提督胡登花率定遠左營五成隊伍同進剿仍留該營五成隊伍會同壽字營一旗馬隊駐守英吉沙爾城垣八月朔日過咬齊牙克達坂抵哈引恰提地方接據色勒庫爾守城明伯克素唐夏等稟報連日賊衆環攻率居民同心堅守二十六日早賊曾派人到城下誘降伯克等以阿布都勒哈瑪在賊營中素稱兇狡非設計擒斬不可乃僞許其降約阿布都勒哈瑪前來定議阿布都勒哈瑪信之旋卽親詣城下該伯克等預選二十餘人各帶軍器出城與阿布都勒哈瑪相見數語後玉子巴什蘇乃滿等卽將該營馬羈扭住阿布都勒哈瑪知已中計拔刀砍落蘇乃滿數指擡馬狂奔幸

二十餘人中有名豁罕者開鎗擊洞該酋背心卽時落馬而同去各人同時開鎗排擊斃賊七名餘賊飛奔伯克等割取阿布都勒哈瑪及七賊首級入城賊黨忿甚攻城愈急盼官軍往救等情劉錦棠得報改道由山路急進因巖窟崎嶇勢難迅速初三日趨行百餘里至勤的克地方擇報色勒庫爾之賊聞官軍將至已於二十九日向北竄去初四日又改道北趨踰卡拉塔什達坂至秦爾里安調賊於初二日已竄至布倫可地方布倫可者西南距色勒庫爾約四站距秦爾里安約兩日程劉錦棠以賊既相距四站若不覓路繞追必難及賊比令董字中右兩營定遠中左右三營各步隊及靖營馬隊西征馬隊一旗暫歸提督董福祥節制於初五日四鼓兼程先進自率總理營務處知府袁堯齡督飭總兵各哨並總兵侯名貴砲隊一旗提督譚慎典白旗馬隊一營提督楊金龍之恪中馬隊一旗軍功何振元之防勇步隊一旗及驢回各馬隊護衛輜重亦於是日辰刻繼進初十日行抵察哈爾良疊接董

福祥稟報初五日抵紮克牙哈奇初六日午刻至察哈爾良獲賊探一名訊據供稱賊蹤相距六七十里董福祥擬乘夜襲之飭各營小憩申刻銜枚疾馳夜分至彼賊已聞信竄去初十日早追至空台根滿斯忽見前面有賊三十餘騎向木吉一路狂奔並見所幸牛馬鮮血滿地知賊去不遠念官軍兩日一夜馳三百數十里人馬勞乏甚矣然不猛進賊更遠颺遂挑步隊之健者乘隊驟隨同馬隊追逐派提督張俊率之先進董福祥率疲乏步隊護輜重繼進齊刻據張俊馳報是日午後追至木吉探賊大股麇聚距木吉六七里地方解鞍秣馬張俊整隊徐進自率數十騎登高瞭望見前面峻嶺夾峙大河貫入谷口賊見東南塵起知我軍追至遂列隊河南分數十團每團數十百騎依山對河按次排列令總兵夏辛酉提督張宗本率西征一營一旗馬隊擊其左總兵田九福之董左營爲接應提督方友升率靖管馬隊擊其右提督胡登花石蘊玉之定遠左右兩營爲接應自率董中營定遠中營隊伍由

中路擊之鏖戰半時勝負未分忽有一綠衣賊曾手執紅旗在前
指揮掠陣勢甚兇悍被我馬軍鎗轟落馬賊遂大敗官軍掩殺約
二里許賊復回拒張俊嚴飭各營整隊奮擊斃賊多名該逆仍死
拒不退夏辛酉張宗本方友升等各分哨由左右兩路繞出其前
自率馬隊直貫賊陣張俊又率所部由中路奮威衝殺人自爲戰
無不以一當十賊方窘蹙至極時復見官軍左右抄截去路將斷
遂大潰狂奔官軍乘勝追至卡拉阿提地方時已天晚遂收隊就
地爲營是夜四鼓張俊仍率隊猛追初八日午刻又復及賊沿途
賊尸枕藉初九日直追至黑子拉提達坂下該逆僅剩百餘騎翻
山亂竄張俊等以過山卽係俄屬阿來地界乃止不追方賊在木
吉西面爲官軍擊敗時張俊等正追賊向前董福祥率隊進至該
處遙望谷口有馬馳出瞥見平川內有賊約二三百牛羊二三千
知爲賊衆所擄在後留牧者董福祥麾隊猛擊賊衆翻山紛竄官
軍急追悉數斬之計是役共殺賊二千數百名奪獲軍械旗幟千

數百件馬匹牛羊數百頭生擒悍賊六十三名內有胖色提買賣
提巴巴一名玉子巴什十五名陣斬著名胖色提曰買賣賽亦提
曰阿子曰亦薩克曰白奇巴圖魯曰阿里必曰開拜克拉八和洛
曰毛拉和買提曰邁提哈力克曰可坎乎完提曰托乎大曰克力
恰克等十一名其買賣賽亦提卽前安夷帕夏阿古柏派充喀喇
沙爾大通哈者也其生擒之買賣提巴巴者卽阿古柏派充烏什
大通哈者也至陣斬玉子巴什據稱有六十餘名難以悉數此八
月初五至初九等日馬步各營追剿疊獲大勝之實在情形也劉
錦棠以餘賊業經過山追亦無及遂飭各馬隊由阿依阿提達坂
回防自率各步隊由碧勒可斯達坂回防以色勒庫爾伯克等固
守城池並能誘殺巨酋厥功甚偉而城外莊稼牲畜被賊劫掠殊
可矜憫因飭提督楊金龍攜帶銀兩緞疋率恪中營馬隊馳赴該
處酌給犒賞以示激勸安撫事竣卽由田角塔回防綠山內道路
紛歧卽各城纏回亦未嘗經歷故飭馬步各隊分路行走兼察地

勢其逆曾阿布都勒哈瑪首級經楊金龍解至喀城當傳飭本地
纏回與該逆素識者驗明傳首示衆除將生擒之買賣提巴巴
色提等六十三名訊明斬梟外其從逆之布魯特頭目庫彌什豁
坎等二名已經按名拿獲解管候訊明分別辦理查阿布都勒哈
瑪與愛克木汗條勒兩次糾衆犯邊狡猾兇頑愍不畏死此次率
黨竄至烏魯克恰提卡外聲言奉俄國號令攻取喀英各城煽惑
部衆及聞官軍布置嚴密無隙可乘遂變計往攻色勒庫爾冀取
該處爲老巢爲復擾回疆張本劉錦棠聞報督隊疾馳踰越重疊
達坂鑿冰開道冒險以行方擬進至伊犁克雅克地方截其歸路
便可聚殲詎該逆偵知官軍進剿先已北趨當官軍行抵秦爾里
安之日賊於前兩日已過布倫可地方方按程計日相距數站雖
派隊急追竊恐未能及賊幸董福祥張俊等迅厲無前士氣競奮
四晝夜馳八百餘里人未交睫馬未卸鞍接仗時猶復倍加抖擻
愈接愈厲卒能殄此狂寇大振軍威惟此次師行所至率皆荒夏

阻絕自來人跡罕到之區石壁冰梯直插霄漢鳥道陡絕士馬均須猱附而升俯視幽壑冥冥渺不見底加之墮霧嵐瘴濃濁殊常中者不省人事致弁丁之染患急症者多而戰馬糧馱之墜崖而斃及勞傷以死者更難數計蓋自出關以來行軍之艱阻勞瘁未有若斯之甚者也嗣接探報愛克木汗條勒竄至俄境阿來所屬可苦蘇地方隨行僅三十餘人內有受重傷者五人可苦蘇北通安集延西通哈拉替根俄人將愛克木汗條勒如何安置之處應候探明續報○竊維新疆邊患以布魯特安集延爲最劇以壤地交錯易致衅端也而布魯特之汗互相雄長安集延之條勒爲回族所崇信故汗與條勒一有煽動內地回衆卽靡然從風轉相勾結星星之火足以燎原非乘其初發急起撲之不可也劉錦棠自克西四城後上年速勒陝回金山去冬今春兩勦安集延布魯特各逆此次復勦阿布都勒哈瑪愛克木汗條勒用兵不越旬時渠目幾無漏網而內地各城得安堵如故雞犬無驚者則審機之明

赴機之速有以致之。前奏以賊由外卡之外繞攻色勒庫爾地勢崎嶇劉錦棠由喀什噶爾英吉沙爾邊境以援色勒庫爾程途較爲坦易不料賊攻堅城不下逆酋中計授首羣賊聞官軍驟至擁愛克木汗條勒狂奔避官軍而北竄劉錦棠指麾各營改由北路前截後追備嘗艱阻卒以賊役愛克木汗條勒雖賸二十餘人遁竄俄境死灰難以復然亦概可見矣所有此次及前次速勦陝回金山及去冬今春兩勦安集延布魯特共四案尤爲出力文武員弁兵勇謹擇其尤者併爲一案繕具清單恭呈

御覽伏乞

天恩逾格准獎以示優異此外出力將士猶多應歸另案保獎庶足勵士氣而播

皇威而偉伐遐宣可增史牒之光亦可靖兵戎之氣其力戰陣亡者

天恩飭部照擬保官階從優議卹以慰忠魂所有勦辦邊寇大獲

勝仗情形謹會同幫辦甘肅新疆善後事宜前浙江撫 楊昌濬

據實馳陳仰祈

聖鑒訓示施行

光緒五年十一月十一日

遵 旨開單報銷摺

竊 前以西征軍需收支款目繁鉅部議分別造冊開單礙難照辦 憑陳實在情形請自同治十三年正月起截至光緒三年十二月底回疆肅清止分作兩案一律開單報銷以昭核實而歸簡易各情於光緒四年十二月十七日拜摺具陳本年三月初四日差弁齎回原摺奉

旨著照所請該部知道欽此當於本年四月十一日將同治十三年分收支各款彙爲一案欽遵開單專摺

奏部奉

旨該部知道單併發欽此跪聆之下仰見

聖明崇實黜浮至意下懷欽感莫可名言茲據辦理陝甘後路糧

台湖南補用道王加敏辦理駐陝軍需局署理陝西按察使陝安道沈應奎會詳稱光緒元年正月初一日起截至三年十二月底回疆肅清止一切收支欸目彙爲一案收欸則以奉撥部帑並各省關協餉洋商借款商號那借及前次單開實存餉銀爲大宗其次則捐輸稅釐丁課各營兵勇截曠台局扣收平餘諸雜欸與夫穆圖善雷正綰各軍專餉由統收分撥者內除撥交穆圖善金順英翰明春自行造報之欸及解交烏里雅蘇台借用西征糧台餘存駝價以及撥還前次單開此案劃借軍餉銀兩一併劃清外茲截至三年十二月底止共管收銀二千六百七十四萬五千九百二十一兩五錢九分六釐一毫五絲九忽六微此入欸之實數也支欸則以馬步各營旗弁勇歷年應支口糧及補發前單積欠口糧以及津貼各營糧料價值水陸轉運腳價撥解餉銀滙費爲大宗次則採辦軍裝軍火旗幟號衣帳棚洋鎗洋礮子藥銅帽以及車騾鞍屨什物等項又次則商號利息隨營辦事各台局當差

文武員弁薪水書役工匠護勇長夫口糧紙張油紅等費又次則各軍屯墾經費漢回安插賑濟津貼州縣辦公奉差員弁川資傷亡員弁勇卹賞各等項通截至光緒三年十二月底止共支銀二千六百四十五萬二千六百三十兩九錢三分八釐六毫二絲五忽二微此出款之實數也以出抵入應存銀二十九萬三千二百九十兩六錢五分七釐五毫三絲四忽四微歸光緒四年正月以後支用造報而本案欠發及前單積欠之款各營軍餉除裁撤歸併營註銷欠餉不再補發外實欠發銀四百三十八萬一千九百一十六兩七錢一分一釐九毫六絲八忽七微各營傷亡弁勇卹賞養傷則實欠銀三十一萬四千三百九兩五錢四分七毫三絲八忽二微又欠發此次入款項下列收洋商及各台局挪借各款銀六百七萬五千八百兩均係實欠應還之款應統俟光緒四年正月以後收到協餉陸續發還另案造報以清界限據王加敏沈應奎等開具清開詳請核明具

奏前來^臣維此案報銷分年攤計用款比之歷年爲數較多誠以大軍遠征荒徼萬里轉輸致一鍾而費十鍾每糧一石運至軍前積價至數十金卽軍裝軍火等件無不運價倍於採價此脚價匯費一項較前案加多之實在情形也至華洋各商號利息多於前案幾將十倍蓋由本案協餉不時挪借過多以致息銀積成巨款其弁勇口糧製造軍火文武員弁薪水屯墾經費等項均較前案略有加增則以出關後各營不扣糧價新疆闢地日廣捍衛藉資器械辦事需員克復城池隨地安插戶口時勢不同事難畫一業經另片陳明在案^臣職兼度支惟有隨時隨事力求核實以期仰

副

宸衷茲據該台局開單會詳到營^臣覆覈無異謹遵

旨將光緒元年正月初一日起至三年十二月底回疆肅清止收支各款彙爲一案繕具簡明清單恭摺敬呈

御覽懇

旨飭部核銷其光緒四年正月以後軍需收支款目已飭令該
台局隨時清釐以備另案具

奏伏乞

聖鑒訓示施行

光緒五年十一月初八日

敬陳新疆善後事宜摺

竊維新疆善後事宜以修濬河渠建築城堡廣興屯墾清丈地畝
釐正賦稅分設義塾更定貨幣數大端爲最要已前奉

諭旨南北各城應如何隨宜經理之處卽著悉心籌畫次第興辦
比卽恭錄咨行南北兩路在事諸臣一體欽遵旋准張曜劉錦棠
咨呈并據前署鎮迪道周崇傳現任鎮迪道福裕委辦吐魯番局
務道員雷聲遠稟報前來以修濬言之哈密修石城子渠鎮西廳
修大泉東渠迪化州修永豐太平二渠安順一渠綏來縣修長渠
奇臺縣修各渠吐魯番所屬渠工之外更開鑿坎井一百八十五
處庫爾勒修復舊渠四十里庫車濬築阿柯寺兩大渠皆各防營

將領督飭防營兵勇輪替工作其兼用民力者給以僱值地方官募民興修者亦議給工食誠以民困甫蘇未可責以力役也以城堡工作言之居國屋宇以利棲止農商工匠之所宜也行國旣應移逐水草畜牧游獵之所便也今既聯異域爲一家則城堡不可以不設奇臺綏來喀喇沙爾庫庫或因舊基或拓新地均不勞民力不耗公財而崇墉屹然足資保障以屯墾言之鎮西廳屬兵民報墾五萬數千餘畝奇臺報墾民戶九百有餘軍營新墾六千六百餘畝迪化舊報承墾三千餘戶核多浮冒茲按冊報連新增民戶實只二千有奇軍屯尙未據報畝數昌吉新舊墾戶共一千三百有奇綏來共九百餘戶吐魯番及南疆八城除沙磧外荒地漸少新增屯墾均在新開渠工兩岸未據冊報畝數其熟地適當清丈之際劉錦棠張曜現飭各局員冊報俟清丈竣事始可彙齊送核也以清丈言之量地卽履畝之法長短廣狹非丈量不能明肥腴瘠薄非按冊不能準而西北地多高仰土性善滲需水尤殷水

足者地價倍昂以產糧多也水歉少收價亦隨減將欲則壞成賦必先計水分之充詎定地畝之瘠饒科糧賦之輕重光緒四年徵收無額。與劉錦棠張曜周崇傳函版相商仿古中制而更減之按民間收糧實數十一分而取其一經收回目任意增減者許戶民自陳印委各員傳經手人斥責甚者加以革黜并令於收穫後通行清丈按地畝肥瘠水出贏絀分九等科賦地既廣濶創行之初事體繁雜人役弓手多不諳熟一時未能集事旋改爲上中下三等徵收以取簡易迨五年秋成册報猶未造齊仍照上年十一分取一之例征收民間輸將爭先約計六年秋穫丈量可竣按畝科賦多寡始歸一律矣以賦稅言之鎮迪一道光緒四年分徵收各色京斗糧六千九百四十餘石房租銀六千一百餘兩吐魯番廳徵糧一萬四千二百餘石地課銀二千一百餘兩喀什噶爾征收各色京斗糧料六萬五百八石英吉沙爾征收二萬六百七十二石葉爾羌征收七萬九千四百七十二石和闐徵糧三萬六千八百

七十九石徵折銀色五千四十九兩課金四百六十兩阿克蘇徵糧一萬四千二百三十石徵折銀色三千三百三十八兩徵紅銅黑鉛磺鐵均照額交納烏什徵糧八千三百七十八石徵折色錢五百一十繕庫車徵糧一萬二千八百四十九石徵折色銀五千餘兩徵紅銅棉花如額光緒五年秋開徵仍按照四年徵收欸目如數完繳內如喀喇沙爾一城因久罹兵燹流亡未復四年無徵五年分據各局報徵過各色京斗糧六千五百九十八石尙未截數綜計南北兩路徵收糧數折合京斗已二十六萬一千九百餘石而專就南路收數計算較戶部鈔案從前額徵十三萬餘石已增十萬六千五百石有奇此皆清丈未竣暫照十一分徵收之數若丈量完事併加入北路續增及開渠成熟地畝新賦合算自更增無減此外稅課折色有照常徵收者有併入釐稅徵收者就釐稅言之各局冊報自四年秋冬至五年夏不足一年已收銀十八萬有奇亦稱入欸大宗如伊犁事定商貨暢行則釐務自有起

色姑勿論也以義塾言之新疆戡定已久而漢回彼此扞格不入
官民隔閡政令難施一切條教均藉回目傳宣壅蔽特甚將欲化
彼殊俗同我華風非分建義塾令回童讀書識字通曉語言不可
與南北兩路在事諸商飭各局員防營多設義塾並刊發
千字文三字經百家姓四字韻語及雜字各本以訓蒙童續發孝
經小學課之誦讀兼印楷書各本令其摹寫擬諸本讀畢再頒行
六經俾講求經義疊據防營局員稟興建義塾已三十七處入學
回童聰穎者多甫一年而所頒諸本已讀畢矣其父兄競以子弟
讀書爲榮羣相矜寵並請增建學舍頒發詩經論孟資其講習局
員送閱各塾蒙童臨摹做本筆姿頗秀並稱蒙童試誦告示皆能
上口教以幼儀亦知領會蓋讀書既可識字而由聲音以通言語
自易爲功也張曜因出

聖諭十六條附律易解一書中刊漢文旁注回字刊發纏民見者
寶貴足見秉彝之良無中外可分欲善則善理有固然雖不必化

民成俗而其效已可觀也以貨幣言之回民市易舊用制錢漸專用銀而成色高低分量輕重驟難明晰奸僞日滋阿古柏竊踞南八城創鑄銀錢名天罡式圓如餅中無方孔不類錢形其成色分量任意低減圖售其奸故市價相權不能允協民以爲苦應改造銀錢以平市價而利民用惟改造銀錢宜先製模式較準一律交官設局經理然後私造與贗僞易於辨認而行使可規久遠。飭蘭州製造新式銅模交張躍督局依法試製範銀爲錢用銀片錘成不須鎔鑄枚重一錢外圓內方輪廓分明字蹟顯朗大小厚薄如一與制錢相權銀爲母銅爲子市邊通用可免畸重畸輕之患而新模精巧由官改造工速費節私假不致混淆人知寶貴准張躍呈送樣錢前來。察核無異試俟試行漸廣請

旨遵辦期爲新疆創此永利以救圖法之窮凡茲數端均已有的緒可尋漸著成效者也至於中土蠶絲賴及萬方而湖產尤甲中土泰西市舶駢集滬上航海往返費省運捷非若陸路之艱阻也西

北各部落行國居多衣被廬帳取給氈片禹貢於崑崙析支渠搜皆以織皮概之由來久矣近代以來參用蠶絲和毛彈織精緻殊倫售獲善價惟與中土通商專在陸路運致維艱新疆南北產桑土人但取甚代糧或稱藥材蠶之利未廣俄羅斯及諸邊種人購絲於新疆不足仍議入蜀購絲。通檄南北兩路局員檢校屬境桑株陸續稟報統計桑樹八十萬六千餘株教以飼蠶繅絲諸法兩年始有微效據各處呈驗新絲色潔質韌不減川絲前飭滬局採運委員胡光墉延訪德國開河鑿井織呢師匠帶購機器來蘭州入製造局教習西法並飭募僱湖州土民熟習蠶務者六十名交委員祝應燾由籍管領並帶桑秧蠶種及蠶具前來教民栽桑接枝壓條種甚浴蠶飼蠶煮繭繅絲織造諸法自安西州敦煌哈密吐魯番庫車以至阿克蘇各設局授徒期廣浙利於新疆也所以先南路而後北路者以南疆生桑頗多一經移接便可飼蠶繅民勤習工作可收事半功倍之效由是推之西四城更推之北路

耕織相資民可使富卽西北諸行國取攜亦便毋庸度隴趨蜀以
買新絲遠商拜惠懷我好音彼獲其贏我亦得施其控制之術從
此氛祲潛消亦未可知非僅釐稅有增稍紓軍儲之急已也特事
涉創行無速效可觀不敢多所論列惟有電勉圖之仰副
宵旰憂勤之意謹一併附陳伏乞

聖鑒訓示

光緒六年四月十七日

甘肅新疆防管承修工作請飭部備案摺

竊查甘省內地自遭兵燹以後千里蕭條東路各屬地居衝要荒
廢尤甚如會甯縣之翟家所張陳堡安定縣之王公橋隆德縣之
六盤山固原州之三關口等處均爲著名險隘其間溝澗深窄河
道沮淤道路橋梁率多傾塌夏潦冬冰時有阻滯傾覆之患農商
行旅均以爲苦嗣經統領武威軍甘肅平慶涇固道魏光燾統領
楚軍中路各營記名提督鎮海協副將周紹濂會同統領楚軍前
路各營提督劉端冕等督飭各該防營於操防護運之暇次第承

修會甯屬境大小磚石土木橋十九座種樹二萬一千餘株安定屬境木石橋八座種樹十萬六千餘株金縣屬境木石橋三座種樹四千四百餘株皋蘭屬境木橋一座種樹四千五百餘株修造會安等處祠廟行館書院一十三所險阻大小路徑亦均修治平坦涇州屬境大小木石橋九座平涼屬境大小木石橋二十九座固原屬境大小木石橋十座新開三關口蓋店瓦亭沿河一帶石路四十餘里隆德屬境大小橋梁六座六盤山上下車路二十餘里靜甯屬境大小土橋七座新開會甯縣城東起至翟家所止車路四十三里又自陝西長武縣界起至會甯縣東門外止計程六百里節年共種植成活樹二十六萬四千餘株柳湖書院種活樹一千二百餘株平慶涇固道署內外種活樹一千餘株環縣屬境種活樹一萬八千餘株董志縣丞及鎮原縣境種活樹一萬二千餘株此外平慶涇固各屬驛路固原北至平遠以達惠安堡鹽路均已一律修治平坦又先後承修平涼慶陽隆德合水董志縣丞

鎮原平遠各府縣城垣衙署及各祠廟堡寨驛館所需經費皆由各營旗隨時捐發並由魏光燾陸續捐給經費銀八千七百餘兩以上各工業經委員勘驗均已完竣堅固此關內東路一帶興作工程之著有成效者也西南各路防營將領如統帶良輔等營總兵凌春臺在河州屬之三甲集開挖水渠四十餘里創建水磨三盤設立義學三處又修祈家集水渠一道太子寺堡城垣壕溝並栽樹株三家集舊河城建立廟宇並昭忠祠四所統領楚軍左路等營提督鄧榮佳在狄道州屬之中部修土堡一座洮濱書院一所疏濬舊渠二道古城子土堡一座栽樹三百餘株管帶楚軍左旗總兵張友元在狄道州城西門外修永甯橋一座計長二十丈高一丈寬八尺又自該州嵐關坪起至白林口止修治道路一百六十里木橋二座管帶楚軍左路後營副將李志剛在狄道北二十里舖修造大水車一具栽樹一萬三千株管帶楚軍律武前營總兵李賓先在循化廳城內修蓋舖屋五十五間並修理城樓及

廟宇一所管帶靖綏營參將黃金福在碾伯縣屬棲鸞堡一帶創
修溝渠築隄作壩二十餘里統領果軍提督劉明燈在大通縣屬
之永安營修補城垣栽樹四萬五千餘株管帶楚軍恒管總兵王
聲揚自碾伯縣屬老鴉保起至響鐘止修理道路二百四十餘里
管帶安西左營總兵張世才管帶宗岳義管總兵張星元在大通
縣境修理道路三百數十里並建修橋梁補置船隻栽種樹株修
復塘卡統領安西等營署鎮河協副將喻勝榮在西甯城外劉家
河灣創建堡城一座並修建鎮河協衙署屋宇管帶向義營副將
敖天印管帶楚軍藍左旗副將朱泰友管帶楚軍藍右旗副將李
正魯先後在平番縣境栽樹七萬八千餘株管帶楚軍左路正中
管總兵周玉堂在平番縣境鎮羌驛岔口驛修造廟宇二所石橋
一道車店一區堡寨一座爛泥灣開修石路一道此關內西南路
一帶興作工程之著有成效者也至新疆南路各城自光緒二年
大兵出關一舉盪平後臣檄飭各該防營會同各善後局修濬河

渠以興水利築繕城堡以嚴捍衛平治道路以利轉運修造官店
以便行旅出嘉峪關七程爲安西直隸州治地近戈壁飛沙堆積
州城東西兩面沙與城齊飭署安西協副將甘雲亮督率弁兵
兼募民夫由城堞逐漸開掘下至城根一律淨盡磚石顯露還復
舊觀引疏勒河水環戶既深且闊沿河種柳以護堤岸城復壕開
可垂久遠哈密廳屬石城子渠先經張曜屯田該處已加修治
等復飭駐紮哈密防營總兵黃本富易玉林重爲濬治以利灌溉
鎮西廳屬大泉東渠經駐紮巴里坤統領蜀軍提督徐占彪督率
興修迪化州永豐大平二渠級來縣一渠並經由官借給銀糧督
飭戶民修理安順一渠現經鎮迪道福裕勘驗興修奇臺縣屬渠
道經署知縣劉嘉德勸明稟請修濬土魯番廳屬官渠坎井經督
辦善後道員雷聲遠駐紮該處防營提督羅瑞秋遊擊宋得祿督
率興修雷聲遠籌借食糧督勸戶民淘濬坎井歲獲有秋庫爾勒
舊有官民渠二道兵燹失修該處防營都司鄒金本督率修復又

庫爾楚一帶河道長四十里水不歸渠旱潦無備防營副將王玉林修築完好宣泄有資庫車阿柯寺塘賽馬里柯兩處長六十里橫貫戈壁工程尤大駐紮庫車統領安遠軍前安徽壽春鎮總兵易開俊督率弁兵輔以民夫修築通暢增開支渠灌溉稱便綏來奇臺兩縣城門女牆均多損壞經前署瑪納斯協副將傅殿魁派勇修復哈喇沙爾爲南疆要衝舊城卑薄復爲賊燬廬舍蕩然惟安集延逆酋阿古柏新築一城勉可補葺防營知縣黃長周哈喇沙爾善後局員知州黃炳焜開拓修築城週三里雉堞改觀庫車舊有漢城甚少年久傾圮東面外環回城局勢頗闊易開俊會同善後局員同知魏炳蔚察看形勢西北兩面均仍其舊其南城及東北東南應卽改築城週千三百三十四弓牆高一丈八尺寬一丈五尺四隅炮臺縱橫四丈四尺四門城樓高四丈八尺雄闊偉壯足稱南疆重鎮由哈密以達吐魯番自瞭墩而七克騰木四驛分南北兩路南爲官道妖風時作砂石俱飛甚者並人馬捲去渺

無踪跡俗所稱風戈壁者也其北有小路可避風災本爲商旅必
出之途然無店宇可資棲息行人苦之七克騰木防營總兵夏奉
朝督飭弁兵將南路驛站移置北路添備官店水草器用此患乃
免托克遜至喀喇沙爾中隔阿哈布拉地方兩峯壁立積石峻嶒
一徑羊腸下臨無際車馱經過輒有意外之虞防營總兵劉見榮
鑿幽鑿險化而爲夷用功至勤羣情欣愜清水河西嫌灘五六里
泥淖縱橫人馬多苦陷沒防營知縣黃長周都司鄒金本會同修
治開渠洩浸墊以巨木雜覆樹枝土石平鋪始免積淖爲患此關
外興作工程之著有成效者也兵燹之餘百廢肇興不資民力不
耗官帑難矣而論其實濟則皆承平時所未經見者非諸將士來
自田間習慣工作而皆知以勤民爲重其效或未易臻此也至諸
工程皆設防護運之餘率作興事未可與工部例章並論且不列
欸請銷自可免由部議而工成犒勞酒食本與軍需賞耗不同爲
數又徵業經酌提各營截贖欸下支用並未開報正欸等現咨

商劉錦棠張曜轉飭善後局員酌量劃撥荒絕地畝招佃承租以作歲修經費庶可保完固而規久遠所有甘肅新疆各處防營連年承修各工程應否咨部備案理合恭摺具奏伏乞

聖鑒訓示施行

光緒四年十一月十七日

復陳新疆宜開設郡縣疏

竊於光緒四年十一月奏復新疆情形一摺欽奉

諭旨事關創始必須熟籌於事前乃可收效於日後刻下伊犁未經收還一切建置事宜尙難遽定其餘南北各城應如何經理之處卽著左宗棠悉心籌畫次第興辦總期先實後名俟諸事辦有眉目然後設官分職改設郡縣自可收一勞永逸之效所有辦理情形並著隨時詳細具奏嗣於五年九月續奉

諭旨新疆地方愚回錮習未除自應規畫久遠移其風俗俾就範圍該大臣所擬改設郡縣應如何辦理之處並著妥籌具奏欽此竊惟新疆南路各城頻年辦理善後事宜均有端緒所有詳細情

形業經會銜陳奏¹⁹與楊昌濬再四諮度分設郡縣於時務相宜如蒙

恩旨俞允會同籌商辦理從此邊地腹地綱舉目張城郭廬帳羣萃州處彼此各仍其舊治外則軍府立而安攘有藉疆圉奠焉治內則吏事修而政教相承民行興焉上無鄙夷其民之心下有比戶可封之俗長治久安之效實基於此²⁰兩次欽奉

諭旨恭錄咨行新疆在事諸²¹意見相合竊計改設郡縣經出經入費用較之從前部撥常年實數不但無增且可漸減誠及此時籌議興辦開設行省於

國計邊防不無裨補按新疆形勢所在北路則烏魯木齊南路則阿克蘇以其能控制全疆地居天山南北之脊居高臨下左右伸縮足以有爲也謹擬烏魯木齊爲新疆總督治所阿克蘇爲新疆巡撫治所彼此聲勢聯絡互相表裏足稱其形勢將軍率旗營駐伊犁塔爾巴哈臺改設都統並統旗綠各營並擬增設伊犁兵備

道一員塔爾巴哈臺擬增同知一員以固邊防北路鎮迪道應仍
其舊擬改設迪化州直隸知州爲迪化府知府擬增置迪化縣知
縣一員附郭州屬原設縣四一阜康一昌吉一綏來一奇臺應仍
其舊擬升呼圖壁巡檢爲圖壁縣知縣升濟木薩縣丞爲濟木縣
知縣鎮西廳同知治巴里坤擬改爲鎮西州直隸州擬仍復原設
宜禾縣知縣附郭哈密通判擬改爲直隸廳同知吐魯番境一名
廣安州爲入南疆衝要首站擬增設廣安道一員以資控扼其吐
魯番同知擬改爲廣安州直隸知州擬升闕展巡檢爲闕展縣知
縣托克遜烏魯木齊通南八城衝要擬就地置托遜縣知縣一員
以資聯絡南路擬設阿克蘇巡道一員喀什噶爾兵備道一員擬
設知府四員一治阿克蘇一治庫車並隸阿克蘇巡道按阿克蘇
卽古溫宿國擬設溫宿府知府一員溫宿縣知縣一員附郭擬設
尹河縣知縣一員治尹河瓦提擬設拜城縣知縣治拜城均隸溫
宿府知府管轄庫車卽古龜茲國擬設鳩茲府知府一員鳩茲縣

知縣一員附郭擬設沙雅爾知縣一員治沙雅爾歸鳩茲府管轄
喀什噶爾卽古疏勒國擬設疏勒府知府一員疏勒縣知縣一員
治漢城疏附縣知縣一員治回城並附郭歸疏勒府知府管轄葉
爾羌卽古莎車國擬設莎車府知府一員莎車縣知縣一員治漢
城莎附縣知縣一員治回城並附郭歸莎車府知府管轄喀喇沙
爾卽古焉耆國擬設焉耆直隸州知州一員治喀喇沙爾並設庫
勒縣知縣治庫爾勒歸焉耆直隸州知州管轄和闐卽古于闐國
擬設于闐直隸州知州一員治和闐並設于闐縣知縣附郭歸于
闐直隸州管轄烏什卽古尉頭國擬設尉頭直隸同知一員治烏
什英吉沙爾卽古依耐國擬設依耐直隸同知一員治英吉沙爾
凡茲所擬建置大略雖經與新疆在事諸公悉心商訂具有規
模而地非親歷究難信之於心既擬置省分設郡縣則政務繁簡
地畝肥磽物產盈虛丁戶多寡差徭輕重爲缺分苦樂所關外權
其經出經入實數爲之斟酌損益俾適於中則官困而民必受其

病適奏調浙江候補知府陳寶善到營。延居幕中令其熟閱新
疆各局往復公牘而爲講求預將興革諸務貫澈胸中飭三月下
旬出關徧歷新疆察驗一切一面就近稟商各總統一面稟報聽
候核示陳寶善久官牧令廉幹耐勞熟嫻吏事茲令參商建置興
革事宜或有裨益至義塾甫興學政及各府廳州縣校官應緩議
設其丞倅佐雜應候分設郡縣後再分別陳奏請

旨遵行新疆各員應否按照邊俸遣調升轉暫時亦可緩議至各
城應安設臺站驛遞增設提鎮副將參遊都守千把外額大小武
職及額兵俸廉餉乾本折均應俟新設督撫會同議擬具奏而藩
臬大員均隨督撫駐紮庶總匯之司得所稟承事無不舉凡此皆
應由新疆督撫奏明次第興辦者非所得預議也如新疆置省
分設郡縣仰荷

諭旨允行應懇

天恩先

簡新疆總督新疆巡撫重以事權俾得隨時陳奏經達

宸聰其新疆軍務。有督辦之責不敢稍有諉謝也是否有當謹
會同頭品頂戴幫辦甘肅新疆善後事宜。楊昌濬合詞具陳伏
乞

聖鑒訓示施行

光緒六年四月十八日